



廣州府志

ル 5
1212
49



廣州府志

卷一百三十五

列傳二十四

門 儿 56
號 1212
卷 49



廣州府志卷一百三十五

列傳二十四 國朝 香山

繆志和

容章美

毛天翀

韋元懿 楊必名

毛濬 子定周

鍾寶

楊瓚

鄭九琨

曹起龍 子賢偉 孫汲

黃時應 劉信烈

麥人寵

何儒

何聖强

李雋

章易

盧文起

鄭基

麥子淳

鄭交泰

方發

廣州府志 卷一百三十五

列傳二十四

方芬

黃紹統

詹官

麥佑

何定江

黃標

何文明

鄭應元

從子敏達

從兄齡

何士祥

何其英

林光洪

毛應龍

梁韜

黃鳳起

何定鰲

七烈士

唐文璣

吳元善

黃培芳

林德泉

弟大斌

曾望顏

黃朝輔

沈志亮

郭金堂

章允升

劉炳南

許榮彪

從兄連陞

盛世昌

鄧應魁

黎源

林謙

何朝亮

國朝

繆志和字子介香山人順治貢生弱歲能文事父母以孝聞
 性和厚鄰人梁某家貧常周其困梁酗酒擊志和子幾斃志
 和不校梁死且施棺以殮人稱長者年荒棄孩載道收養之
 死而無告者葬埋之事母黎進膳必傍侍婉容勸餐母病籲
 天願以身代已有疾必強起行坐恐貽母憂也以母老不仕
 年七十孺慕彌篤母壽百有三歲志和卒祀鄉賢據郝通志
 容章美字仲含邑諸生幼喪母事父及繼母以孝聞與繼母
 弟友愛順治間海賊入鄉擄其父走章美追及曰父老耄不

堪願以身代賊從之時章美次子為他賊所得父先往贖賊聞之怒章美遂遇害聞者傷之據張府志修

毛天紳字漢翼諸生好學能文有才略閩督姚啟聖征臺灣辟天紳從事臺灣地居海島非船不進時泉州永春縣山峒多大木而峒蠻負險恃頑啟聖乃署天紳為永春博士理論諸會遂得木造船連復十九寨及金門廈門諸隘撫剿並行多用其策後以選貢就永安教諭遷安仁知縣禁陋規杜請託興利除弊去任日攀轅者相屬于道卒年七十有九據阮通志修

韋元懿康熙五年海賊襲翠微元懿招眾擊之次年庵山被寇率眾赴敵賊聞其勇遮道擊之遂遇害鄉人感其義祀于西社同縣楊必名遇賊脅降不屈死據大清一統志修

毛濬字孟深邑諸生性純孝五歲母歿父元鈺病足濬視寢膳不出戶者數載父歿善事繼母繼母遺腹生弟天璉濬撫育之尤篤里人黃六亨被寇擄濬贖產贖之歸著有敬義堂集十卷子定周丁酉舉于鄉令丹徒有政績據阮通志修

鍾寶字悅豪習韜鈴姚啟聖宰邑見而奇之亡何三藩叛康親王南征檄啟聖為參謀啟聖以寶從擊紫閩山風橋悉平之啟聖授溫處僉事時康熙十四年三月也尋命寶等進破石礮奪楊梅岡十一月復宣平太平嶺把總十五年甯海將軍貝子授寶千總合剿石塘寶攻破賊巢奪盛甲器械山積進兵復雲和龍泉松溪諸縣十六年啟聖擢福建布政使遷總督寶從入閩是時鄭經劉國軒屢抗

王師國軒取長泰同安進圍泉州再逼漳州兵號十萬將軍

賴塔欲棄城走啟聖曰賊勝而驕擊之必滅成功在此舉矣
啟聖之子儀與寶結兄弟並楊捷張黑子趙二王三癡等十
人皆勇冠三軍乃命閉城息鼓忽一日天大霧吹簞篋三寶
等開城奮戈而前啟聖以精兵繼之呼聲震天賊不辨眾寡
自相蹈藉自辰至酉斬其將鄭英劉正璽等十餘人首級萬
生擒二千溺死礮斃者無算國軒奔海澄遂復長泰同安是
役也破賊十萬兵止五千云十九年正月授遊擊二月克海
倉收復陳州三义河玉洲碼洲等十九寨三月復海澄厦門
金門諸島二十二年福建平加左都督二十八年授陝西潼
關參將莅任七載兵民相輯陞固原鎮西路副將訓練有方
防衛甚密四十三年三月以病卒于官年六十寶質樸有勇
略馭下以恩在潼關時奉部追取各營因飢借款寶具詳請

免疏允免追秦軍感泣教民造筏潼水捕魚為利三十三年

淫雨漲溢民乘筏走高邱全活甚眾靖遠軍以牧馬踐躪民

稼寶嚴約束誅其越界者值歲飢出米二千石給賑秦民以

甦華陰城西建祠繪像祀焉據香山志修

楊瓚字鳴度康熙十七年戊午舉人授浙江宣平知縣邑經

兵燹戶口凋敝瓚請于上官令鄰縣民能墾田三十畝者准

入籍附考由是荒蕪漸闢復捐置義學延師講習其中士風

丕變莅任七載卒于官據阮通志修

鄭九琨前山寨把總康熙中海寇鍾吉生夜劫翠微村九琨

率親兵馳至分三隊從四巷殺入吉生以火鎗中九琨九琨

揮親兵退已尙挺立作擊賊狀賊不敢遽近伺已眾越田方

仆地死其忠烈如此據阮通志修

曹起龍字兆輝有勇略康熙二十二年以把總分守澳門旋調連州星子營時山賊竊發毒流楚粵間起龍領兵挫賊鋒奪回被擄百餘口授陽山城守連山賊陳鳳復起焚劫二廣上官調起龍往征大破之歷險窮追三閱月得賊魁及其黨殲焉陞連山中軍以陽山民攀留許就舊署行中軍事太平龍水尾諸排又叛起龍率兵直搗山谷徭民大恐悉歸所俘以降後以病歸子賢偉五十年辛卯舉人任項城知縣改陽春教諭賢偉子汲歸安知縣有善政民為立碑據張府志修

黃時應字天行康熙三十八年己卯舉人任朥城令輕徭減耗民困以紓辛丑朥大飢設廠煮粥勸粟平糶親歷鄉村民沾實惠罄家資代完舊欠並償倉穀三千餘石壬寅運米口外崎嶇萬里升斗無損以軍功議敘丁外艱歸百姓如失慈

母云劉信烈字乾可七齡下筆輒有奇氣康熙三十八年己卯舉人授夏津令習俗強悍信烈撫以恩威摘發如神案無留牘立義學捐給資脯以造士寒冬贈貧士銀米士人德之庚子甲辰兩校鄉試多得士歲飢捐粟散賑費二千餘金存活無算尋奉檄輓運邊庭以病謝歸年八十二卒據香山志修

麥人寵字錦江諸生常奉母避亂遇賊欲傷其母伏地哀號賊憐其孝兩釋之兄弟同居終身無間言家貧不苟取講學數十載著有研精錄二十卷植槐堂文稿四卷據阮通志修

何儒字席珍幼以孝友聞執親喪骨立比葬築室墓旁晨夕號哭聞者傷感與弟衡友愛肫篤白首不析著故人李某家貧五喪未舉厚助之俾宦窳悉辦其義行類如此以明經終

據阮通志修

何聖強字文作貢生性好義自癸巳至癸丑五值荒年聖強
疊捐米二千七百餘石存活無算復捐田濟宗族之貧乏者
建社倉積穀為里黨備荒踐履篤實善行不可枚舉雍正十
一年授七品頂帶據張府志修

李雋字方青諸生事親色養備至居喪盡禮及耄猶作孺子
泣每晨夕展拜先人始詣塾講業其教人以知言為先自得
為本躬行實踐為究竟家非素封而窮乏孤寡悉力賙之著
有四書講義五卷聖學蒙筌二卷存齋文稿六卷存齋詩刪
二卷子仙枝已酉舉人據張府志修

韋易字文衍翠微人邑諸生寄情詩酒周覽羅浮丹霞諸勝
所至題詠落落有奇氣雍正十三年乙卯鄉薦乾隆元年丙
辰應博學鴻詞舉合省得七人易列第三已給資就道以病

謝歸年八十卒著有四書添解尚書毛詩添解數十卷據香山志修

盧文起字深潮受知學使惠士奇補諸生第一旋食餼乾隆
十三年戊辰成進士是時士奇罷官歸吳貧售所居文起合
同門生醵六白金贖之謁選得湖南臨湘令調貴州仁懷縣
民貧至鬻子女償徵稅文起至寬貸之士不知書頒刻詩文
數種為式文教以興時有婦與奸夫殺其夫投山穴中數月
得屍不變吏曰當折驗文起曰傷痕故在而必折其屍伊何
罪也因請于撫軍謂貴州山高土厚凡屍不變而可驗者概
勿拆撫軍嘉納方擬登薦剡以病假歸旋改教授仁懷民為
建遺愛祠焉家居與兄文興友愛最篤嘗率鄉人作官涌橋
民免病涉張司馬汝霖有記紀之據香山志修

鄭基字築平少孤力學爲諸生以詩文著聲貢國子援例捐知縣筮仕鳳臺鳳臺于鳳陽府爲偏縣基下車問民疾苦縣之東北鄉有通川三日黑濠曰涇泥曰裔溝滙潁上蒙城諸縣水以達于淮縣人統謂之三河歲久三河盡涇上流水無所洩秋雨暴漲挾懸出反入之勢爭注鳳臺彌望成巨浸三農失業基因郡守具牘上請時襄曰修以戶部侍郎出治淮潁諸水先與大吏議所濬地不及鳳臺疏稿已具矣得牘頗難之基侃侃陳利害工程物料僂指無遺算襄賞其才爲補疏得請不逾時工藏農安其居縣有魯松灣土勢窪下瀕歲患潦基捐俸倡建隄障遂成膏腴調定遠舉卓異擢知壽州權知徽州府望誤以上考保留復知壽州州與鳳臺接壤有安豐塘周百里灌田四萬頃楚令尹孫叔敖所治芍陂也歲久塘圯爲農田患甚審覈舊制復繕舊塘爲四門三十六爲閘六爲橋一其旁則爲塢爲堰爲圩啟閉以時汙萊悉闢嘗下鄉見沙地磽确多不治教民種薯蕷佐麥菽壽州不知蠶織而地多椿樹可飼蠶乃購蠶種于山東教之飼養于是壽州農桑並興其後鳳陽亢旱民多流離獨鳳臺壽州以水利之修秋成稔于他縣云升泗州知州會水災籌畫撫賑飢而不害擢知淮安府淮安故水鄉也基夙諳水利謂聚眾水以爭一門淮所以潰也疏之其不可緩于府之東開濬東鄉澗市河于北則開漁濱山字河于西則開護城河壅滯旣通田陌資灌溉引其流兼以濟漕運民便之基于水利講求最熟退食之暇涉覽前史遇河渠水利圖經諸冊丹鉛殆遍以故源流洞悉行之著效擢江南分巡道

命甫下卒年五十六

據香山志修

麥子淳字甯洲少孤力學乾隆十五年庚午鄉薦歷官山東金鄉縣東昌府同知丁內艱起復署廣西泗城潯州太平府知府遷知湖廣襄陽府愛人濟物政績卓著乾隆二十六年曹州十四堡黃河水漫奔注金鄉子淳籌畫盡瘁拯救數萬人泗城與西隆州爲鄰西隆夷民怨殺吏目諸會懼討將謀拒命撫軍駐兵泗城進剿子淳力請親往開示禍福罪人可得如言不效願先下吏允之乃肩輿減從而往諸會偵知之率眾數萬人迎于數千里外感曰麥使君來吾等慶更生矣歡聲聞數里膝行解甲感泣受撫擒倡亂四十餘人置諸法餘無所問襄陽城西北臨襄水堤薄易潰久爲民患子淳捐俸築老子等堤八段水患遂已五十四年移病歸卒年七十

據香山志修

鄭交泰字協德少讀書強記屢試不售由捐知縣揀發廣西補蒼梧縣丁內艱起復知安徽望江阜陽縣遷知亳州六安州擢知嘉興府授浙江督糧道失察漕案降調歸交泰性英毅能以片辭折疑獄當其平反雖大吏盛氣臨之不能奪其署上林也有謀殺人河中者初不得主名其妻樊曰殺吾夫者必盤特串也前官坐樊知情以同謀擬磔交泰至疑而慮之樊在母家嘗與盤特串通將嫁盤特串曰吾必殺而夫及夫見殺故知之而實非同謀申大府不許以去就爭卒得釋南陵知縣陳聯科者潮州人也以贓錢六十千被論時交泰署懷甯縣撫軍雅聞其能檄之審得其胥役及家人作奸情弊坐陳失察以稿入復撫軍擲其稿于地責曰汝爲同鄉徇

邪交泰拾稿徐對曰按牘載勒賑者五人今五人欠繳穀六百餘石陳令果貪豈索錢六十千而止況陳令首捐米二百石何不少捐三十石而作此周折乎且其事與官無涉何用徇爲公籍浙江于同鄉未嘗稍徇乃以徇同鄉罪審者何待已厚而處人薄也撫軍默然旅見者六人莫不咋舌而交泰進退如度明日案定從交泰議知亳州時滁州有高永威者與其黨八人橫劫旋獲二人于定遠據詞當斬五人配二人柳杖一人有司周內以論斬七人題達尋獲四人其詞與前二人同案不能定撫軍檄交泰鞫之力執五人論斬之議提刑怒欲中以失出罪交泰抗言曰獄貴得情耳定遠滁州初報猶在失出罪也失入非罪乎若以題達爲定又奚審焉長揖而出撫軍廉其實以交泰爲然提刑亦悔謝當是時交泰

治聲聞于江南北凡疑獄積年不決交泰一再鞫必得其情性勤敏案無留牘嘗以旬日斷釋積囚四百餘人民免拖累苦去後百姓皆思之嘗獲巨盜韋某釋而用之羣賊皆戢後去官韋挈壺樽送于數十里外其自都還過故治亳州雪甚沒馬腹民爲佐牽轡進酒食初需次都門謁陽春謝仲坑謝故湖南循吏語以讞獄之要交泰用其言故官州縣二十年而招解罪人未嘗翻一詞云

據香山志修

方發字肇餘由監生銓授溧陽縣丞權知縣事有牛鬪觸牧童死其父以謀殺告發廉其情平反之時陳宏謀爲江蘇巡撫下嚴飭發執議不移卒得直撫軍大器之調常熟吳江縣丞吳江丞分防盛澤鎮其民好博歲得陋規丞藉爲利發下車屏禁博風遂絕升江西峽江知縣對調江蘇安東縣縣故

有水門曰便民有小河長一百二十里由佃湖出鹽河以瀉城中水乾隆五十一年黃河溢致淤每積兩舟行市上附郭田成湖不可耕發循行得故道謂疏之便捐俸為倡民相繼効命不逾時工竣祛水患農田復興尋引年歸據香山志修

方芬字清獻乾隆二十一年丙子舉人歷徐聞陵水教諭升安徽廬江縣知縣廬江故多積案芬以三月清之安徽旱荒告糴于廬江者如雲將不給芬曰退糴非古也然通權可以生吾民遂過之民賴以無飢尋丁內艱服闋補直隸赤城縣民貧不知書童試止十數人芬設書院以示之學勒碑于書院凡應考者免徭役垂為永例期年而試者數十人民拙耕稼芬教以築墾之方增田萬餘畝新舊之田種皆倍收漸以饒富大吏以為能調署延慶州知州以差務累民申辨求免

不獲告歸就高要教諭卒據香山志修

黃紹統字燕勳乾隆二十四年己卯舉于鄉選石城訓導進諸生以聖賢實踐之學單寒之儒尤加意拯拔學者稱仰山先生在任十八年擢瓊郡教授士民餞送二十餘里設供帳三百餘所從來司鐸所未有也瓊有劣生被禡賄數千金求復不許復浼上官關說正色拒之卒于瓊瓊人弔唁不絕紹統博學能文尤長于詩嘉慶十八年國史館開儒林文苑兩傳之局徵其遺書上之據香山志修

詹官字煥賓乾隆二十五年庚辰鄉薦挑發四川署梁山令民勒去思碑值金川軍興委解軍餉馬匹事平改發貴州歷署青谿施秉廣順鎮甯開州均有政聲補餘慶令值荒設法賑卹存活甚眾創他山書院宏獎士類嚴緝奸匪良善以安

廣州府志卷之二十一
十一
官久貧如寒士初去職旅居困乏民時以錢米饋之既歸里
黔有賈于廣州者猶問安否不絕其遺愛在人如此據香山志修
麥佑字啟正乾隆三十四年己丑進士授刑部主事升山西
司郎中佑生有異質讀書過目不忘人以神童目之至是治
申韓家言每有疑獄尙書輒令專訊皆成信讞居嘗念刑律
出入生死所係故性雖明敏而定一讞必極審慎形于顏色
秋慮囚披稽案牘夜至漏下數十刻猶聞歎息聲家人請小
休則曰吾職也子姑去四十四年俸滿記名以繁缺知府用
時劉統勳以大學士管部事雅器重佑謂秋曹中有識而能
斷無出佑右者惜佑去遂奏留旋積勞卒據香山志修
何定江字景宗乾隆四十二年丁酉武舉四十五年庚子二
甲一名武進士由侍衛以都司揀發福建補長福營右軍都

司調補閩安協水師都司定江生長海隅于舟師駕馭攻戰
尤爲曉暢屢以擒獲洋匪敘功歷遷水師提標左營遊擊閩
浙督標水師參將澎湖水師副將至金門鎮總兵官丁艱起
補浙江定海鎮總兵尋以失察罷仍留任復以獲賊功擢浙
江提督定江蒙

上恩棄瑕錄用益感奮誓以死報嘉慶戊辰十一月攻蔡逆
于温州海中定江親援桴鼓士卒踔厲賊勢披靡復極力窮
追未獲而定江病作逾月卒易箚時拊床呼曰蔡逆未殄奈
何死也年五十有五據阮通志修

黃標字殿豪其先潮州府南澳人以宦居籍香山幼孤負薪
養母讀書知大義膂力過人能開二石弓左右射甫冠充南
澳鎮標步兵拔外委乾隆四十五年補香山協鎮左營都司

中軍守備五十五年海賊起標率舟師擒賊首吳昌盛等于
澗洲并剿狗頭山盜記大功嘉慶元年十月奉委統領各營
兵船出洋巡搜二年授廣海遊擊擢海門營參將三年擢廣
東左翼鎮總兵五年以功

賞戴花翎七年惠州賊陳爛屐四擁眾據羅浮制府吉慶檄
標帶兵同提督孫全謀赴博羅分道拒戰標選健卒從間道
埋伏伺間轟礮賊駭竄標冒險深入焚其火藥局大兵繼至
遂破羊矢坑羅溪等處直搗巢窟擒其魁賊平是役也標為
前鋒讓功弗居分其銳卒為提督所統麾下爭功幾鼓噪標
獨以恩威靖之以平寇功

賜玉扳指帶頭荷包等物且
褒以嶺海要臣不可旦夕離職守

命繪像以進封武顯將軍後與孫全謀出海捕賊賊遁廣州
灣灣險不可進標欲合兵守隘俟賊糧盡而殲孫妒標功謂
日久有風濤患乃少分兵令標守隘賊方困偵知官兵戰船
少冒死衝突眾寡不敵標乃占上風發礮烟迷賊艘佯作追
捕全師以退仰天歎曰失此機會海氛何日已也憤懣成疾
卒于雷白營瀕卒猶躍起大呼放船云標生長海壖習知水
性出海攻賊親持舵駛帆運礮發火如弄彈丸一舟先眾舟
尾之浪高如山迎風上下若履平地賊畏之如虎自結髮從
戎出海未嘗失律與士卒同甘苦人樂為用剿賊惟殲首惡
不妄殺所獲物以其二賞將士其一為修船費分毫不私彌
補軍中器物未嘗輕動庫帑獲賊必親解省不輕擾地方官
降者推心腹俾自効擢顯職為良將者數人所習韜鈴不自

秘麾下承指授建殊績者不可屈指于東南海道淺深險易之處黑夜皆能辨識望日月罡斗知風雨人目爲海疆長城手焉註測天賦及海疆里道圖卒年六十有二

據香山志修

何文明字堯臣小欖人乾隆己亥舉于鄉八上春官不售嘉慶辛酉挑發河南署臨潁內黃息滑四縣補洧川所至以廉能稱方震卦教首李文成偽軍師牛亮臣之倡亂滑濬也與直隸山東教首林清等相應豫境烽烟相望文明以公事至彰德彰郡距滑濬僅百里地接長垣守令束手無計文明陳守禦十策守屬以兵事文明以越俎辭守曰國事也文明于是修城池造樓櫓備器械峙糗糧旬日畢辦乃募敢死士明賞罰授戈登陴賊數來窺文明下令偃旗韜鼓賊始大疑久之見雉堞寂然稍近方欲駕梯攻城文明忽揚塵燃巨礮四

城皆燹火以應賊大奔自是不敢窺彰德大吏擬卓薦以當道齟齬中止乙亥視事洧川洧地四衝官役郵傳故事派民供號車六十輛吏因緣爲奸文明下車設車馬局捐廉爲倡餘按地畝攤捐置公車畜馬乘定徒庸司以公正紳耆凡有徵發取給于局民免供億吏無所操縱洧之民頌之漳河決大吏派買麻束給價不能如值州縣苦之文明以洧川地瘠民貧力爲請免大吏不允文明請解任豫藩賢之遂從其請洧川知邑宰之以解任爲吾民也積年逋賦一時皆完納尤長于聽訟故宰洧三年獄無冤民案無留牘辛巳引疾南歸舟至洞庭端坐卒生平廉隅自矢而能濟人急需次省垣時楚詩人徐石泉歿于旅舍出貲殮之洧川鄒令卒于官虧帑金數千老母眷屬百餘指不能歸文明慨然爲之代償爲之

申牒且為之治裝遣役護之歸其慷慨如此孫瑞丹咸豐壬子庶常璟道光丁未翰林兩江總督據阮通志采訪冊修

鄭應元字文川乾隆四十六年辛丑進士選庶吉士改內閣中書充三通館纂修官兼總校官引病歸嘉慶十年海寇闖入內地知縣彭昭麟奉檄與紳民籌防禦應元偕從子敏達從兄齡邑人劉鑄輩出貲糧修戰守具相度險要陸續建渡口濠涌上閘港口犁頭嘴礮臺水柵以遏賊衝十四年夏六月總兵許廷桂遇賊敗歿逃軍入應元倡議首賑米以安難兵次募勇以屯海岸邑以鎮定未幾應元卒年五十有五據阮通志

何士祥字景祥生而魁偉豪縱不喜讀書好騎射力能挽強中乾隆四十五年庚子武舉五十二年丁未成進士選藍翎

侍衛授本省海安營守備調崖州營擢硃州營都司碣石鎮中營遊擊每出洋剿捕輒親冒礮石為士卒先沈沈盜船擒盜首軍功屢著在崖州護理參將會盜船至黑水洋乘風破浪來往如飛士祥與眾計曰海面遼濶賊人熟諳水性迫之則遠颺非設伏誘之不可遂于諸港汊埋伏戰艦自乘小舟獨往挑戰賊果合眾來迎且戰且退誘入重地伏驟發四面環擊之擒馘尤夥嘗署吳川都司平海參將其去也父老感泣遮留若失所庇其在碣石也甲子村民以爭墟場械鬪聚眾數千勢猖甚士祥單騎往宣示

朝廷威德諭以禍福眾悟而解陞福建水師參將尋病乞休病甫愈提督錢夢虎知士祥智勇可用貽書招之士祥亦出以內河緝捕有功將奏請起用士祥辭曰所以竭蹶從事者

圖報知已耳若謀復用不與初志刺謬乎乃止未幾卒年五

十據阮通志修

何其英字瓊玉少孤家貧事母以孝聞乾隆六十年乙卯由舉人挑發陝西以知縣用明年攝鳳縣事兼署留壩同知四川白蓮教匪倡亂縣之斜谷與褒城連雲棧通舊有馬二百匹無事寄牧于民有事則徵之民受其累其英至裁之軍興役民輸運困躓道路其英乃捐俸購騾馱載民力以紓留壩民有號草上飛者土惡也糾眾為亂撫軍某募鄉兵剿捕之名曰秦師師多無賴子將又無律所至淫掠民疑為賊發礮禦之斃六人督師聞之大怒欲坐以謀反民懼逃匿窮林中天寒多凍死其英招輯之挈其人與秦師質其英曰秦師淫掠民疑為賊故發礮禦之實非謀反鄉民團練以禦賊也秦

師淫人掠人非賊而何民實擊賊官又罪之將何所措手足乎其英故有治聲督師某耳其名怒乃解縣西境與四川為鄰防賊侵軼其英設備不少懈嘗往西安中途聞警遽反難民紛紛趨城門者方拒爭其英至命悉入即登陴為守尋與遊擊蘇維龍擊賊進口關殺四十餘人賊披靡去已復來寇維龍戰死遠近皆震其英設奇守禦賊一歲五至不能得毫髮利自是不敢犯大府廉其能題報寶雞縣經略額勒登保亦保奏交部議記大功一次時嘉慶五年也初其英官留壩聞母訃即解任奔喪大吏援金革無辟之禮奏奪情至是已九年矣川賊平奉文回籍補行喪服其英莅寶雞三年辦大差十二次兵差十六次皆自發價顧募以故虧帑數萬金百姓詣制府請留且願代償允之越八年乃畢百姓代償者二

萬餘金于是謝病歸闢地半畝于葵水之濱雜蒔花木顏曰有巢讀書課子不與外事卒年七十一

據香山志修

林光洪孝出天性早失怙家貧傭工奉母問所欲必力致之侍病體察疴癢足不離榻母歿哀毀柴瘠廬墓三年嘉慶壬戌鄉有會匪羣脅之光洪曰我世為良民不汝從也請辭母靈就死賊嗟歎去光洪卒年六十二後十八年邑人士上其

行題旌建坊

據阮通志修

毛應龍乾隆五十二年丁未以千總隨總督孫士毅征安南攻市球破其寨柵應龍復賈勇奪河橋猝被礮傷卒梁韜亦官千總嘉慶十四年捕海盜于沙灣韜舟當先與賊戰適舟擱淺灘賊蜂聚過舟兵校多鳧水避韜發火器焚其舟與賊俱斃餘賊氣奪官兵大隊不受賊迫者韜之力也先後事聞

黃培芳號香石石城教諭紹統子明祭酒佐八世孫也嘉慶甲子副榜肄業太學充武英殿校錄官選韶州府乳源教諭培芳操履端潔留心于經世之學早為鄭士超馮敏昌器重當道聞名延課子弟遊其門者多知名如尙書許乃普侍郎羅文俊其尤著也官乳源時新進諸生書券為贅及送出門返諸其袖乳源大旱徒步入山禱雨立應人呼老師雨量移陵水以士鮮書籍詳列當讀書目遍諭鄉間邑有順湖書院膏火不敷三昧寺有餘田僧徒啟爭密言于有司驅僧撥田贍膏火陵人德之時海上洋寇萌孽居民避入城縣令以公事赴郡培芳飛書崖帥請援城得無事祁墳督兩粵時延入幕用其策論各屬團練分南海為七社調其民輸戍省垣甚得其用敘勞加內閣中書銜世居郡城泰泉舊里藏書萬餘

卷咸豐丁巳英人入城培芳以先祠圖書所在堅守不動後卒無恙人服其定識性好遊嘗六上羅浮築粵嶽祠于絕頂以觀日出又與張維屏輩于白雲山築雲泉山館祀蘇文忠崔清獻及文裕以志景仰著述甚富尤邃于易咸豐丁巳年八十重遊泮水逾年卒

據采訪冊修

林德泉號澡廉由廩生中道光辛巳舉人乙未挑知縣分發安徽署石埭調太湖太湖有良民被誣告大府檄逮治德泉爲之申理以去就爭之乃得釋去官時攀留者遮道二十二年英咭利之役調赴上海軍營英人闖入吳淞直指江甯主兵者徙庫儲于安慶委德泉督運甫出江口舟子聞礮驚逃德泉率親兵揚帆入皖得無事復調防禦江東德泉先于和州東西梁山設伏乃沿江建礮臺張旗幟英人兩至皆不敢

進德泉陳防江戰守策江蘇巡撫程商采善其議檄所屬行之旋署和州涇縣二十五年補蕪湖邑環江多賊德泉募勇懸賞捕治之二十八年再調江蘇督水師追獲海寇蘇走等于浙江之普陀洋救出被虜數十人功上以海疆知縣調補後以同知升用先換頂戴三十年補青浦振興文教士風蔚然咸豐元年調廣西軍營江南督撫以海疆奏留調宿遷三年調安徽軍營領粵東水勇剿上海股賊四年以軍事奉檄回粵會匪事起廣東督撫奏留原籍董團練蕭家渡之捷德泉與有力焉省城軍與制府召香山紳士募民勇蘇廷魁薦其弟資泉德泉以資泉性疏使其子福盛從累戰功擢至雲南兵備道德泉年七十有五卒弟大斌字恭廉捐衛千總慷慨好義善騎射道光甲辰三合會匪萌葉大斌仿軌里連鄉

法以弭其患正月官兵捕賊歐石等大斌截之于路被戕死鄉人哀之督撫奏卹典如例據采訪冊修

曾望顏號卓如嘉慶己卯舉人道光壬午進士館選授編修由御史轉給事中遷寺卿府尹累擢福建布政使護理巡撫代辦閩浙總督以查庫虧空追治免官賠補完繳給還主事起授通政司參議再遷順天府府尹陝西巡撫調署四川總督以陝西參劾屬員翻案解任同治四年起授內閣侍讀學士回籍卒望顏剛果嚴毅知無不為座主英和湯金釗並器重之居諫院時條奏多稱

旨既擢京卿

宣宗以遇事敢言指陳明白許之尋遷京尹望顏感激報稱不避嫌怨嘗搜剔順天科場積弊及隆豐寺三官廟僧尼響

馬大盜事多波及要津株連官監人皆危之糾彈不職州縣與兼尹大臣反覆辨難一意孤行不顧也庚子擢任閩藩陛辭曰

諭以地方屬員事一面自奏毋庸會商督撫致畏首畏尾望顏愈加感激到閩兼權督撫二篆時洋人闖入省城呈國書望顏命福州府督標參將收之許為代奏使者悍然道府請見望顏以和約未定若請見當從琉球諸屬國陪臣禮節洋使固爭將軍以下勸貶損以顧大局望顏曰設有變故我一人當之遂調麾下七營將士列堂下發礮鳴笳鼓升帳使者逡巡不敢進將國書交府縣官代呈遂揚帆去八閩皆詫異未幾罷歸

文宗御極起復密奏粵東吏治之壞民生困苦之狀反覆數

千言

上爲動色再任京尹嚴于其舊擢陝西巡撫陝西戎政廢弛望顏親臨考校裁汰老弱補精壯以訓練又以秦軍貧乏禁支糧減尅勝于藩署大閱自出犒賞秦軍感悅乃行保甲勵鄉團勸民積穀備緩急登山視險要築寨堡擒治紅黑簽匪商旅夜行河南擒匪經楚軍驅逐闖入武關調飛騎星馳剿之限三日至賊不虞官軍之自天降也竄還豫望顏以事關兩省不分畛域先奏獎楚軍其固持大體皆此類也治回漢獄亦無軒輊臨潼漢回鬪幾致亂遣官齎文書馳往曉諭各捕其爲首數人遂解散回中大憝拜六兒者歷任無敢攖其鋒望顏以兵圍獲之並獲漢人中巨惡李芒兒同日梟示回人遂甯貼川境賊起

命移節督川蜀之戎政更壞于秦賊已陷州縣奏調陝甘兵至人地生疎檄土司兵至則芻糧戈甲皆不給乃捐廉數千金卹之士兵始踴躍用命而陝西被劾屬員翻案臺參事起部議革職留任再劾成都翁守詐贓翁亦互訐遂解任回籍文宗駐蹕熱河詢軍機大臣以望顏行止尙書穆蔭侍郎匡源以翻案臺參誣罔對且謂望顏負性過剛故不合時宜文宗歎息久之

穆宗御極起授內閣侍讀學士以老乞假歸同治庚午夏四月卒于南城里第年八十有一望顏勤于官事校簿書恆至夜分服食一如秀才時再仕再已粵中大吏招之不出亦稀見其面先是學政于新進覆試每名繳十金有奇名曰開門銀望顏爲御史奏請禁革粵東州縣于未及定罪及牽涉之

犯另設繫所名曰外羈凌虐勒索一如狂獄望顏並奏劾之
其有益于鄉多類此據采訪冊修

黃朝輔字賡暢道光八年戊子以廩生中式越年成進士即
用知縣簽發湖南任鄱縣先是邑令到縣縣尉必遣差于民
間責供輿衛朝輔知其弊立罷之而自備輿馬入民為歡頌
歲大歉有某姓告劫去穀米者大府欲置之法朝輔廉得實
知民為飢驅非稔惡者力爭不從遂治其首惡餘皆獲免壬
辰調知平江捐廉助修育嬰堂乙未五月大旱朝輔設壇梧
桐山禱雨山極巉削難行朝輔夜行至山焚香籲天雨立至
後冒寒得疾卒于官據采訪冊修

沈至亮以字行家于前山寨南之龍田村志亮生而倜儻慷
慨尚義道光十六年英人闢馳道夷居民塚墓滅骸骨和議

成英人復大闢馳道殘暴甚于疇昔民不敢爭愬官置勿問
志亮先墓亦被害思所以報乃與其同志郭金堂吳姓數人
懷刃伺之英酋負勇敢出入皆以兵從自春徂秋不得間久
之酋益無忌偕西洋酋數騎出志亮曰可矣乃使或為販魚
或為鬻果蔬弛擔于道若觀馳馬者金堂又以野卉盈束置
于道馬聞香不肯前時日將夕天且風馬騰塵眯目志亮遂
出番字書投英酋酋俯接而視遂出刃刀勾其頸墮馬酋挾
手槍負痛不及擊志亮遂斷其首並斷其手埋諸山場之外
金堂誅其從者西洋酋疾馳走入關金堂宣言于眾曰此鬼
罪大惡極故我官府百姓欲得而甘心餘弗問也諸夷惴惴
不敢出馳馬十三行皆震懼華人聞者莫不懽呼相慶夷稍
定奸人嗾之詣軍門索殺人者制府欲弗許而恐開兵釁欲

以死囚代奸人又甚之索酋首為證制府不得已乃趣紳士
勸之出志亮遂與金堂挖所埋首與手行赴有司即下獄金
堂語志亮曰爾有母無子死不如我爭自認而卒坐志亮制
府恐民變昏後即棄市金堂論遣戍制府卹其母千金聞者
莫不歛歔太息云據采訪冊修

韋允升字東暄少嫻刺技目能視日不轉睛怒則鬚眉盡張
由千總中道光戊子武舉以材武受知于湖廣總督周天爵
奏留在楚教授兩湖軍提督羅思舉試其技贈以寶刀由是
知名以捕盜功著回籍以營千總即用道光二十一年英咭
利入虎門總督祁墳知其能命募民勇數千列營于新菴山
原朝夕訓練旋以議和罷允升遂退居于家廣西髮賊起周
天爵以大臣視師奏調允升募勇助剿時賊已十餘萬允升

部下僅五百人身先士卒摧破勅敵斬偽先鋒廖八生擒數
百擊斃無算賊望見旗幟輒退舍秋七月初十日甲午進攻
桂平縣之新墟奪賊礮臺直撲賊壘賊患其恃勇深入伏莽
火攻死之從者鄭啟科梁廣源等皆陷歿西軍為之奪氣大
臣賽尙阿烏蘭泰以狀奏

諭照都司例議卹祀昭忠祠據采訪冊修

劉炳南字亮勤少有奇氣年十五從仲兄奮南宦山海關好
與北土畸人俠士遊議論兵事旋里試不售捐未入流職道
光二十一年英人犯省垣炳南應募守東濬加六品頂戴藍
翎以修香山城議敘加捐府經歷分發湖南南抵楚歲飢議
賑委署長沙縣丞司賑務兩月之間存活萬計賊首李沅發
巨股撲寶慶陷新甯羣賊蠢起巡撫馮德馨檄督糧道楊炳

堃鹽法道雷成樸帥大兵集新甯調炳南從軍命與守備熊
釗領兵四百駐新甯之崑山甫立營謀報賊由大絹崗之左
八角亭踰嶺過炳南白楊雷與熊釗及都司張心銘守備周
萬遠帥兵追之至半山賊冒險衝突炳南奮臂大呼戰士皆
向前賊墮崖溪死者無數生擒頭目李承莫等十一人追至
羅遠岡督兵攀蘿緣壁上別股伏賊蝟起來擊官軍陷絕地
楊雷擁兵不發一旅兵遂潰炳南猶裹血野戰多所殺傷賊
圍攻斷其脰與守備熊釗皆死之賊去從者昇屍還傷痕共
二十有四凶信至長沙馮怒其輕進不為請卹後湖南軍事
日壞言官劾馮落職楊雷皆遣戍咸豐二年新任巡撫駱秉
章莅事家人赴楚陳狀駱始以其事聞照例

賜卹並祀楚粵昭忠祠

據采訪冊修

許榮彪與從兄連陞從都司李揚陞赴廣西軍督兵按察使
張敬修知其勇敢選充親兵隊長從張軍克復陽朔荔浦縣
又沿途克復修仁昭平藤縣擊退梧州艇匪五年夏調回廣
東與解封川德慶肇慶城圍八年冬十月從兄連陞領香山
兵勇赴西江會諸軍堵剿充許勇營哨長解廣甯城圍平桂
口上下塆賊巢三十餘處九年夏剿開建伍村大逕賊巢與
賊首陳金剛巨股鏖戰累日榮彪獨當前鋒擒斬髮賊獲軍
資器械無數加五品頂戴藍翎十年春駐兵于封川之猿嶺
逕三月初三日賊先設伏乃逼我軍接戰伏起軍陷連陞傷
榮彪衝擊不能出遂戰死

據采訪冊修

盛世昌居濠鏡澳慷慨勇敢從提督張國樑軍拔充隊目駐
七甕橋四年秋七月金陵髮賊來犯世昌敗之從大軍移剿

廣州府志卷之二十三
太平府賊直抵府城東門外焚賊營二擒偽丞相莫大烈克復太平五年春報捐千總仍調赴仙鶴門棲霞山一帶邀擊六年春從大軍攻下蜀街周郎橋焚賊營二斬賊目奪黃旗進討高資賊掃其巢穴擒偽指揮李年夏四月從大軍援六合渡江至龍池賊設伏以待世昌單騎馳突銃斃黃衣賊渠三擒偽先鋒陳蛟我軍始達六合而江右之賊已撲甯國高淳指秣陵關世昌從援軍西還勝之五月從援鎮江京峴山軍營提軍下令襲賊世昌潛踰重溝火其營賊駭遁六月小丹陽之賊據溧水世昌從援軍連戰一月破之于黃土橋焚賊營七秋七月移剿金壇世昌夜負火藥潛入金壇城內外夾擊大破之七年五月追賊至句容城外世昌緣城先登殺守者大軍繼入遂復句容乘勝攻磨盤山虎頭山賊營皆破

之大臣和春陳奏

賞戴藍翎八月大軍圖復鎮江移駐高資偽忠王李秀成全隊來爭提軍令世昌攻其營世昌仍潛渡縱火十月焚紅旗橋營十一月焚竹里廟營遂復鎮江功上以守備儘先補用冬十二月大軍移指金陵將軍令世昌助攻洪山康家墳下馬牌金川門賊營皆獲勝陵子口之戰我師敗績秀成率生力賊自黃山馳至再戰數日閏三月十五日己酉六十營俱潰世昌率部下力戰死之

諭贈都司銜照都司例賜卹祀昭忠祠

據采訪冊修

鄧應魁咸豐二年投江南吳淞水師營入伍以獲盜功補蘇松鎮標右營把總旋領舟師赴蕪湖上遊與髮賊戰于蕪湖下關獲勝

廣雅卷之二十三
賞戴藍翎署中營千總又獲賊目黃天福等于鎮江洋獲賊
馬宜富等于北固山補福山鎮左營千總四年自春徂冬擊
賊于瓜洲儀徵九洲一十九戰生擒蔣興達等四十餘賊
焚其船筏五年春正月四戰于下關斷其橫江鐵鎖大臣向
榮奏以守備儘先升用夏五月克東山梁山又克蕪湖六月
至秋九月戰于荻港飯籬山裕溪口神灘河生擒偽伍拾指
揮黃心田等十三人補南漕營守備七年春二月擊賊棕陽
破欄江磯斬首七生擒頭目二十四冬十二月大通六戰身
先士卒銃斃二賊奪其二營斬殺四百餘生擒頭目郝春榮
等八年四月擊賊于無爲州屬之土橋七戰破青山灰河二
壘躬負囊土填塹拔土橋大石壘一生擒偽監軍廖萬元等
應魁兩股受矛傷秋八月復戰于梁山磯破賊營冬十月連

戰于大通紅楊樹戰于六百丈九年春三月戰于青溪口夏
五月戰于長龍山迭有燒船斬馘功十年八月初三日甲子
賊數千攻太倉州應魁馳救中火銃歿于陣事聞照例優卹
加贈遊擊銜祀昭忠祠據采訪冊修

黎源字應科由吏員捐從九品分發廣西署北流縣雙威司
巡檢西粵自平南俶擾陸川博白諸屬同時應之北流處其
中腹背受賊容縣嘯聚尤密邇如是者已將十年七年春正
月容賊圍北流城源調鄉團赴援天大雨且霧不能戰賊穴
地火攻破東門擄官踞之源以孤軍退保隆盛墟繞道如州
乞師州牧命剿州之垆心賊旬日平之遂檄權北流縣帶兵
剿賊與賊二十餘戰敗之脅從之鄉皆返正源營逼城五六
里兵勇久疲不敢進雙威紳士以練勇千餘來助源欲藉其

生力還六靖墟圖克復而軍需窘之人心叵測請卸縣回司本州仍以剿賊專屬源八年春二月土賊結連容賊二萬餘八道入寇源悉殲之道路無梗夏六月初五日進攻北流走容賊克復北流適北流江合以丁憂去士民赴本州請源復權縣事于是撫瘡痍緩徵歛散誘惑始議收復容城而容賊久踞上游勢鴟張自八月出師雖屢戰屢勝終未能掃穴擒渠源深以為歉旋實授潯州秦川鄉巡檢任如故九年春三月總督檄源會鬱林博白陸川之兵合剿北流賊大克之陷賊諸砦悉反正北流獲安枕者十年源之力也以文教久廢興復舊章延師課士幾于邑有絃歌矣容賊以源故不得逞合平南桂平諸悍賊大舉入寇總督勞崇光檄鬱林州全屬會剿夏六月州兵出守西山源出守旺芝塘各距北流城三十里為犄角秋七月二十四日賊破西山州兵退守北流城源仍守旺芝塘賊悉眾攻旺芝塘連日所殺過當然賊日多兵日寡或勸源且退師源以軍營一動則諸鄉皆被蹂躪督戰益力以身先士卒賊覘旂鼓處燃礮中其喉遂死之時咸豐十年八月十四日乙亥夜也僕黃三亦為賊焚殺云賊以重價得源屍攻北流城士民以源故効死賊圍匝月不克乃昇屍回容縣十一年十月北流士民以二百金賂賊贖其骸骨後令遣役送之歸事聞

賜卹廕祀昭忠祠子宗濂襲雲騎尉

據采訪冊修

林謙號若谷大車鄉人道光戊子舉人大挑一等以知縣分發直隸告終養歸咸豐六年以團練功加同知銜保舉孝廉方正道光辛卯米價昂謙倣朱子社倉法行於鄉丁未復於

墟設助倉各鄉互相則效積穀遂多崇義祠屯田變價應繳銀萬四千兩邑眾束手謙以田爲仁良十都人士文會費令照三益會法變通之設立章程得銀二萬兩繳價外以其餘增產三項香邑徵糧輪圖甲舉總催官給之票名曰金花票糧吏賣票於圖役圖役向輪戶訛索名曰大當陋規歲萬兩謙首建言除之與邑紳吳景濂等詣縣陳狀胥吏乞哀於官持不決適曾望顏自閩藩回籍謙屬其致書邑令陸孫鼎痛抵其害弊始革庚子英咭利以禁烟啟釁姦宥乘之謙告縣集眾於雲衢書院立章程嚴攻保東鄉賴以安自是以嚴禁會匪爲先務甲辰乙巳間三合會匪煽惑東鄉悉破獲無有入其黨者丁未戊申西粵賊起謙知其必及我也先期爲備分東地爲六局督鄉團察游匪設總局於邑城之東策貲糧

通軍務預應援又謀於下伽山小隱港三仙閣興築礮臺藩蔽東海咸豐甲寅秋賊果破港口東遷者絡繹不絕夜行亦無戒心謙帥鄉團星馳至營於東門外邑令邱才穎謂東鄉民激勵有素使之登陴時西北江鄉鴈行頓刃礮聲殷天而卒無潰志者恃東鄉爲退保地也邑之士客錯處素相安同治壬戌秋他邑土客構禍訛言石門客民將爲變謙不爲動廉得其僞榜諸通衢事得已謙沒後其子求葬地過石門其鄉人曰微爾先人無有今日地惟所欲當時訟曲直者咸比之王彥方云學宗李安溪張惕菴主講豐山書院與生徒辨論必求精確年八十尙能燈下作小楷其精力不可及云所著有增輯周易觀象四卷圖一卷類學訓蒙四卷耄覺菴筆記一卷退思錄十卷續編一卷國地異名錄一卷退思雜文

四卷續編四卷退思日覽一卷聰聽堂訓言一卷光緒二年

請祀鄉賢

據香山志修

何朝亮字品鑑小欖人年二十六歲由監生報捐守備道光十六年授安徽撫標右營守備累遷壽州都司髮賊擾安徽九月賊船由柘皋運米至巢縣大隊泊巢縣東關聞官軍至奔運漕北朝亮擊之賊走裕溪遂復巢縣當舒興阿之援廬州也城垂破臬司張印塘檄朝亮與總兵楊青鶴赴援朝亮率所部八百人由中路進兵賊立木城拒敵官軍攀援直上賊分兩路來襲官軍撤攻回擊守備包紀功攻其後朝亮攻其前遂大敗之十二月復調回廬州禦賊朝亮晝夜兼行中途為賊所阻力戰奪隘迨至而廬州已陷上命江南提督和春為

欽差大臣福濟為巡撫辦理安徽軍務

責令先復廬州和春檄朝亮帶兵攻廬州北門晝夜力戰連奪城外賊營擒偽丞相陳宗勝

賞戴花翎五月朝亮偕同知江宗濬等復攻北門和春親督各營進剿十九日直抵賊壘戰不利朝亮遂帶隊爭先奮擊三人賊營眾寡不敵力竭死之事聞從優議卹事蹟付史館祀昭忠祠同治初年給事中潘斯濂奏朝亮死事尤烈得建立專祠同治十二年二月

賜諡勇烈

據香山志修以上香山

南海李徵爵分纂

番禺史悠履初校

番禺史悠乾再校

番禺金佑基三校

南海顏以湘四校

廣州府志卷一百三十五終

廣州府志卷一百三十六

列傳二十五

縣

國朝

三水

新甯

清遠

新安

花

梁子豹

梁為鵬

霍作明

陸肇泰

鄧莫右

郭曰槐

蘇文

梁喬堦

周星聚

胡建偉

鄧鵬翰

陸蒼霖

梁肇文

鄧純

郭恭

張永成

陸沛英

鄧光岳

徐大襄

梁元

子一鵬

鄧兆桐

梁汝彌

廣州府志卷一百三十六

列傳二十五

梁光釗 以上三水

陳王道

趙陞

陳璇 弟瑚

趙彥統

李假山

湯命夔

馮俊

陳遇夫 子瀚

李郁

甄松年 父崇德

馬敦仁 以上新甯

劉鳴泰 溫任經

白炯中

禰庭芬

徐彪

朱灃 父大裕

郭儀長

程尙德

郭鍾熙

郭志融

馮應鏞 歐大彪 郭志信 以上清遠

何靈運

陳雋蕙

鄧文蔚

溫澤孚

陳景芳

江士元

賴恩爵 父鷹揚 叔信揚

劉起龍

曾榮 以上新安

黃學倫

黃士龍

宋衍

劉斌全

駱秉章

宋維屏 族人魁文 健文 瀨 樹

宋蔚謙 父廷楨 叔廷桂 鍾瀨 以上花縣

國朝

梁子豹字不野三水龍池人康熙三十二年癸酉舉人任廣西富川縣縣多獠蠻獠戶踞險夙號難治豹孚以誠信遂變為禮義之俗民立去思碑 據三水志修
梁為鵬字博斯鄧坑人於書無不讀詩文宏博奇麗為嶺南

諸名家所引重康熙戊子舉於鄉庚寅考授內閣中書故事禮闈取士酌定進士額合十八省以南北分之湖廣江西福建四川廣東五省合江浙滇黔為南卷而論卷取中焉康熙五十一年會試五省京官欲呈請分卷別中以免偏枯議久不決鵬毅然身任事得

上聞下禮部議乃復分南左南右以別之未幾引疾歸邑有富宦欲從祀鄉賢令已徇其請矣府檄邑紳結覆鵬憤然曰崇祀大典烏可以冒濫污鄉先生乎挺身攻擊卒賴以寢居鄉訓子弟敦齒讓樂施與晚年益自斂抑和平坦易多長者

風據三水志修

霍作明字良賓董東人康熙五十二年癸巳舉人雍正十一年癸丑成進士授山西汾州府臨縣甫下車即捐俸修學宮

聘名師王義學講席課士論文人才蔚起遇旱躬冒烈日徒步四十餘里虔禱是夕甘霖立沛臨民頌曰霍公雨嗣值歲荒詳大府開倉賑濟助資糧給牛種民慶盈甯焉大學士張廷玉贈以廉聲直比玉壺清句民立祠祀之據三水志修

陸肇泰金竹人性至孝得父母歡親病衣不解帶居喪哀毀備至殯葬盡禮結廬墓側宗族稱之乾隆四年旌入祀孝弟

祠據大清一統志三水志修

鄧莫右字作聘南岸人少能文聲滿蠻序屢躋棘闈雍正元年癸卯由恩貢登賢書年六十矣平生以敦倫篤學為務學使陳某手書此四字旌其門人以為實錄云據大清一統志三水志修陸文明驪坑人雍正七年己酉領鄉薦乾隆十七年壬申謁選得楚南平江縣甫下車首革徵漕積弊育士課農設施犁

然就緒布政使周人驥極為嘉許會教諭缺員卽命兼攝聽政之餘集諸生至署講論弗輟邑人沐其教文風一變秩滿引疾歸其恬退如此據三水志修

郭曰槐字條達莘村人以雍正十年壬子解元聯捷成進士乾隆癸亥授浙江松陽縣兼署遂昌淡於仕進未久卽解組歸安貧嗜學近所少見也蘇文字瞻如與曰槐鄉會同榜成進士同籍候銓一室授徒依然儒素村前積淤成坦曰海心沙民爭承墾歷年不決邑令重文廉介屬爲文業使陞科族人爭出資助之文弗能卻旣報承文歸之祖嘗爲通族歲祀之需且備早潦荒歉嘗曰邑侯盛德文不敢辭亦不敢獨私其利宗人蕃衍可共保之隣里至今述爲美談據三水志修

梁喬棟字髻麓大崗人登乾隆九年甲子賢書乙丑聯捷成進士歸銓選將促裝行矣會同邑進士蘇文赴銓在都病卒不能歸塋解裝暫留百計經營益以稱貸偕邑舉人歐陽騰親送回籍選授四川名山縣多惠政廉潔自好不事奔競秩滿不遷尋卒於官據三水志修

周星聚字以德黃岡里人醇正風雅行與文稱乾隆二十四年己卯舉於鄉初任東安教諭羅定人士多負笈從之文風一變銓授湖廣穀城令自謂之民社才改補高要教諭以誘掖獎勸得士心廣肇諸郡學者聞風至門弟子之盛時罕其匹卒於官欽州馮敏昌銘其墓著有竹里文稿據所通志修

胡建偉字式懋三江人少穎異勵精爲學卒以文學顯乾隆二十七年戊午舉於鄉己未聯捷成進士謁選得直隸無極縣遷正定母喪去服闋補福鼎鼎爲閩之邊界隣於浙當兩

省之衝冠蓋所經輒借民舍棲止不堪其擾偉為築候館以居之公私稱便未幾歷永定調閩縣所至以循卓稱累擢澎湖通判署福州守仍兼通判復護糧驛道時以一身縮三符咸就理澎湖為海中孤島遙隸臺灣士子赴府道試再渡重洋風濤險惡以故人鮮就學

國朝茂才僅三人偉至建文石書院延名師啟迪之詳定歲

科二試由澎湖考送書院士咸樂之終其任得庠生十三人

尋陞漳州南勝同知調臺灣北路理番同知卒於官據三水志修

鄧鵬翰號肄江清塘人領乾隆二十五年庚辰鄉薦授曲江

訓導秩滿升江蘇青浦縣司鐸時捐俸修祭器創給月課獎

賞循循善誘士論翕然及宰青浦甫莅治即浚淤塞以弭水

患青邑漕米向多勢豪包納至悉絕之官斛平收不許浮溢

民有鄧慈父之稱尋署川沙同知亦多惠政巡撫汪某時督

糧儲歎曰鄧令好官但恐不久任耳逾年果去官歸據三水志修

陸蒼霖字吳澤金竹人少負文名乾隆二十七年壬午舉於

鄉三十六年辛卯成進士授禮部主事晉員外郎充學政全

書館會典館纂修官禮部向有飯食田責佃取租蒼霖憫其

租賦稍重請於

朝歲減額銀四百餘兩遷郎中記名御史尋擢廣西右江道

以柳州西陲諸郡俗多簡陋至則首葺羅池祠增柳江書院

膏火延名師毅然以育才為己任兩權臬篆恤刑慎罰大府

倚重焉臺灣告警調廣西兵巡撫檄赴黔粵交界之梅寨司

地方點送官兵出境因感烟瘴差竣卒於官官民為建祠於

柳江書院據阮通志三水志修

梁肇文字景圖沙頭人乾隆三十年乙酉選授興甯教諭善訓士給赴科卷資士感而奮歲饑捐俸倡賑存活甚眾秩滿調陵水邊俸滿銓江西奉新縣引

見改直隸昌黎邑士多貧恒就四庫館備書自給筆文擇其能文者月給膏火使卒業復捐俸屬紳士生息為士子赴科納卷費邑有淤田數十頃擇親老孤寡及貧士無田者承之以訟擾公庭者黜勿與抑其公費實其征稅俾經久之乾隆四十五年

上南巡以除道勞

賜衣一襲紀名候升適以母憂回籍哀毀遽卒據三水志修

鄧純字誠中金利三甲人乾隆四十四年己亥鄉薦以知縣籤掣陝西歷署韓城臨潼白水同官麟遊懷遠等縣兩權州

象所至有政聲白蓮教擾川東關中震動純兩解軍饌入川屢犯險阻大府憫其勞檄署臨潼潼故劇邑民逼賊警多他徙廬舍幾空純至多方捍衛賊不能犯城賴以全然瀕於危者亦數矣故其紀事詩云義士奮身甯惜死老夫矢志不偷生時論壯之郭恭字翼聖領乾隆四十五年庚子鄉薦乙卯以知縣籤掣福建視象莆田補龍巖州州同調署臺灣府嘉義縣莅任未久值劇盜竊發先往勦捕擒其渠民賴安堵大府咨部議叙尋以勞瘁卒於官據三水志修

張永成字思遠張邊人軀貌雄偉有膽畧由軍校歷官潮州營都司嘉慶二年帥粵兵赴兩湖留營協勦屢著斬獲功尋調赴四川勦教匪臨敵奮勇為士卒先經畧上其勞加游擊銜

賜巴圖魯名號戴花翎晉階武義都尉三年隨征達州旂山之戰賊勢張甚永成躍馬入陣賊數重圍之戰愈酣自晨至昃血其刃者無算四顧援絕突圍不得出沒於軍世襲雲騎尉據三水志修

陸沛英字量中嘉慶十三年戊辰科舉人大挑二等借補揭陽訓導丁艱服闋截取授商州州同署理商南縣事六載考滿改教再司鐸揭陽新進貧生有賣房屋具備贖者却之富室有用偽契圖奪貧民地者訊明罰錢二十貫給孤老院養口富民恥之進賄百貫求免罰峻拒之其廉明如此據采訪冊修
鄧光岳字躍池嘉慶十八年癸酉科舉人鄉薦後授徒於省藉館穀養親家無擔石恬如也壬午年制府阮元閱兵過境光岳謂書院以育人材河口舊有總督行臺將就傾頽可將

此改建書院聯稟上請制軍報可即名曰行臺書院紀實也光岳又請將大洲小洲新洲諸沙撥歸書院以充膏火亦蒙允准至今士林賴之癸巳西潦大至廣府屬田廬多淹沒大府令紳士區玉章張葉南等設局捐賑三邑當西北兩江之衝災深而恩未及光岳據實稟請大府準發賑饑銀三萬餘兩知縣張某延光岳主行臺書院講席商議分賑章程民慶更生是年七八月西北二江潦水復漲比往年尤甚三邑大路圍正當其衝崩則禍移南順光岳請總修基圍委員余葆澐通稟大府給銀三千累石鑲土大路圍始固其有益於鄉閭多類此也乙未大挑知縣簽掣山西六月由京赴太原奉委武闈供事偶感風寒終於官邸據采訪冊修
徐大襄字台暉嘉慶十八年辛酉舉人迭署各邑教職在吳

川時月課諸生生中有林召棠者大襄決其必入翰苑道光
癸未林果以第一人及第人服其相士之精授樂會教諭調
邊移昌化昌化文風樸陋向無拔貢學使白鎔按臨襄以陳
登瀛薦學使允之昌化之有拔貢自此始也後歷儋州四會
俸滿應陞以母老請復任近教丁艱服闋授連州學正到任
倡修學宮以興文教學使戴熙爲作記不兩載選山東鄒縣
襄挈眷赴任留諸弟家口於鄒身自赴京當事者疑其年老
以原品休致南旋日鄒邑紳民知其清白籌費千餘金助之
其清介感人如此據采訪冊修

梁元龍池鄉人嘉慶十八年癸酉舉人道光元年舉孝廉方
正不就挑選綏猗廳教諭充越華羊城兩書院監院九年三
水坡子角蜆塘圍決又大路圍良鑿圍等基皆壞大吏親臨

驗看命開九龍山取石委之修築元自備資斧竭力堵修而
水勢洶湧再築再決大吏詣堤致祭三年始竣功民慶更生
十三年三水大水復委勸捐賑濟訖事毫不入私以薦擢知
縣十六年遷河南盧氏縣引

見改浙江瑞安縣歷任縉雲永嘉平陽桐鄉各縣所至屏絕
規費洗手奉公浙江課稅每銀一兩民納錢一千瑞安額銀
三萬在任三年積欠墊銀二萬餘兩謁上官請參處民代爲
繳乃已凡吏胥下鄉發發飯食並明諭地方如有訛索許指
名稟追追之不出官償其費差革其役建學興教拯災助賑
所知必爲不惜囊橐每當去任屬民皆香燭跪送仕宦十餘
年一貧如洗積欠至萬餘兩移粵監追地方官以產絕告乃
止卒年八十二子四人一鵬候補直隸州歿於王事贈道銜

世襲雲騎尉

賜祭葬據采訪冊修

鄧兆桐字吉士嘉慶二十四年己卯舉人大挑知縣分發陝西歷署安塞澄城洛南縣實授武功官澄時有張孝婦割臂愈翁病事下車卽詳請旌表有生員黨塾爲刁婦佔據歷三任不能斷桐立判結之任武功值大旱徒步往太白山禱雨山高峻古語所謂武功太白去天一握者桐冒險登之卽夕大雨值年飢詳請賑濟民賴以安在武功十一年惠澤甚普致仕日民攀轅不忍去據采訪冊修

梁汝弼字直卿少孤力學道光二十年庚子舉人二十五年乙巳進士攝湖南嘉禾縣知縣故事官下鄉役吏輒以百隨民苦供億汝弼下車首行裁減以免騷擾俗多以命案株連

刁悍者藉爲漁利坐繫充斥汝弼清積獄分別省釋民咸賴之城內書院久廢捐廉撥款聘名師教授文風漸興鄰境藍山縣齋匪攻城以先籌防得不陷尋以本任兼護桂陽州篆辦理裕如逾年補授新田以母老改教職旋丁艱歸主行臺書院講席書院原設城外咸豐初爲紅賊毀拆汝弼議建復擴城內之鳳岡古院舊址而興之縣城向無考院又集眾紳籌資創建自後人才蔚起焉服闋遷廉州府教授以足疾請開缺疾痊轉補韶州府教授抵任數月卒於官據采訪冊修
梁光釗字聰遠少穎悟力學能文道光十一年辛卯舉於鄉謁選知縣籤掣湖北初任遠安倡建沮江書院循聲藉藉丁母憂回籍服闋歷署宣恩來鳳尋補鄭縣淫雨敗稼齋宿詣城隍廟禱晴夜夢神告曰地將有水災亟宜遷避乃集紳耆

議於附城土山上多搭蓬寮為避水計俄頃水至促民遷避不終日漲至數丈衙署民房多被衝塌人民賴以保全遭髮賊之亂大憲派捐軍餉供億浩繁貧無以應遂乞改教得澄海教諭歸卒於官

據采訪冊修以上三水

陳王道新甯汶村人明亡土賊蠡起王道倡築垣墉環鄉四周以為固當是時王與聚黨數千人擾近海諸鄉順治十一年春屠大隆尚劫貨財擄婦女至是來攻汶村王道率鄉勇三百人禦之且為鄉鄰援與患之攻數月不下乃計誘之錮居北泥欲降之王道罵不休且曰吾為臬卿死毋為李陵生也與更厚以宴禮而不屈如故與黨謀曰王道所繫懷者在汶村耳既屠汶村彼將焉懷與於是環攻益急遂破汶村王道聞之口占曰赤族無能除寇害黃泉有路話鄉愁即縊死

子四人三際昇同被害

據新甯志修

趙陞一名友敬海晏都人順治甲午以後山賊擾攘屠毒鄉里已亥陞謁平南王慨然以鋤奸安良為己任王授以官與拜他喇布勒哈番吳廷桂同管海晏場務康熙癸卯領兵往黃竹湖禦寇甲辰授章京丙午大兵勦碣石花山賊陞奉命運礮藥詣軍營屢紀軍功既而退歸田里時值展界已酉與王府官余德義往海晏場募人煎鹽給資開墾一都安之

甯志修

據新

陳璇字爾玉陳瑚字爾重海晏都人兄弟也順治乙未六月王興屠汶村踞為巢穴鄉人逃竄璇父瓊杰病將屬續璇年十二朔年九歲獨守床前遣之不去曰父在兒將焉往父曰能逃生即為孝子吾旦暮人俱殲無益也吾與三聖寺僧為

道友奔之當救汝二子急奔僧哀求為父延壽僧曰此何時也二子欲返僧力止之且削其髮令為徒賊禮佛見之疑為陳氏子幽於別館僧陰擲餽餅三日賊以酒肉試之二子俱合掌念彌陀不食遂得免僧乃夜縋二子走別所以脫父痛二子之奔僧也不欲殘累二子匍匐出門不知所終二子每以不得父骸骨觸念即不欲生展界後以奔僧父命也脫難僧力也因造佛奉事持長齋每逢奔僧日泣然曰吾兄弟以此日逃生吾父以此日死別也終日向隅水飲不沾終身如是瑚持齋尤力年九十四無病而逝璇終亦年八十二據新甯志

趙彥統字石城浮石人膂力過人手運夾叉四十觔康熙間所居東有賊鍾吉生西有伍茂剽掠鄉里彥統募鄉勇築壘

堡為一方保障鄉鄰或謝以金不受後官廣州出海捕盜遇

莘村綏仰綏成兄弟為賊所劫彥統駛舟殺賊救之綏成已

死綏仰以重貲謝亦不受及守順德馬甯海寇充斥彥統親

冒矢石賊徒畏之後歸田馬甯人建廟江干以祀據新甯志

李假山字瑤嶽文昌都人康熙二十年辛酉舉人官山西陽

曲知縣禮士愛民革火耗禁科派名譽焯然以母老歸養已

卯復任浙江甯海壬午分校得人為盛歸田後嘗出粟賑饑

邑合宜思讓扁曰周急維桑年七十二卒據新甯志

湯命夔本姓梅姓崗都人康熙五年丙午舉人年十四父歿

哀毀骨立見者憐之任新貴令革陋例四十條民情歡戴未

幾旋里教授生徒儼同寒士熊某有所請託賂田三百畝却

之其廉介類此卒祀鄉賢據郝通志

張府志修

馮俊字榮昌雒崗都人由廣海寨把總補順德千總權中營守備康熙十八年冬海寇犯境力戰陣亡事

聞贈都司僉書給祭葬廕一子為衛千總據張府志修

陳遇夫榜姓梅字廷際雒崗都人舉康熙二十九年庚午鄉試

第一久之當謁選遇夫自以垂老恐弗克報効遂不仕雍正元年

詔舉孝廉方正邑令薦之遇夫力辭生平潔身砥行敦崇禮節淹貫載籍論著卓然撰正學續以明漢唐諸儒學統相承未嘗中絕重訂楊起元所輯白沙語錄以明陳獻章之學由博返約非墮禪悟別有詩文集史見古今文詞詩賦見迂言等書年七十有一卒子瀚字本深康熙五十三年甲午省元父子領解為時所稱瀚性至孝居喪哀毀骨立取予一介不苟而重推解歲凶出粟以賑貧乏未仕卒著有觀海堂書義

嶼門集據阮通志張府志修

李郁字策志文章都人雍正二年甲辰登賢書兩次分校西省邑令王暉延為甯陽義學掌教乾隆戊午聘修邑乘後以明通進士擢龍川教諭陞邵陽知縣邵陽舊多陋規郁一切除之邵民立遺愛祠以祀焉據新甯志修

甄松年字森文父崇德署揭陽訓導以孝聞松年乾隆三十年乙酉舉於鄉入都充內廷方畧館纂修三年報滿議叙知縣三十四年己丑中中正榜授內閣中書丁二艱服闋補官充四庫纂修繕書處分校官轉內閣典籍監督富新倉五十四年己酉成進士依舊供職陞刑部江蘇主事佐獄明慎有蘇姓命案由外議絞松年以情有可原獨議駁改徒篤於事

親痛封翁之卒不得視含殮母疾奉事醫藥無不躬親守制時座王德保來撫粵未嘗進見也官京師二十餘年恬淡安命兩補外皆不就僮僕解散與劉塘最契工書右手病以左手代之求者踵接云

據新甯志修

馬敦仁字瓊照德行都人乾隆五十九年甲寅舉於鄉嘉慶辛酉挑知縣分發福建歷署羅源福安海澄諸縣甲子署甌甯縣值旱荒請於府開倉賑濟捐廉告糴以補之制軍王某閱邊至縣以為才委署龍溪去甌甯日百姓遮道送之龍溪素稱難治敦仁先在漳州清釐積案深悉土俗寬猛相濟民情大安時巨寇蔡牽擾臺灣調粵兵會勦由漳配船敦仁調度有法閩閩安堵先賢陳北溪墓為強族立宅毀傷二十餘載矣驅令遷去建霞文書院以育士餼廩必豐公餘為諸生

論經義既遷去龍溪人為位祀於書院戊寅借補永春州州同未之任龍溪後任柏成以宿憾發其虧空二萬餘兩撫軍依例參劾其實不過二千餘耳龍溪民捐金以償未竟而卒

據新甯志修以上新甯

劉鳴泰清遠人年三十膺鄉薦遭父母之喪不赴公車事祖母以孝聞部催赴試泰懇請終養遂歸隱順治四年丁亥山寇陷城流劫縣境城內無一官一卒泰獨往河澗懇武弁彭某帶兵經過者滅賊脫一鄉于水火焉戊戌滇寇甫靖四境復熾邑里苦官徵本色泰具詞赴藩院情詞懇摯得改本色為折色邑里賴之温任經順治十六七年間縣人朱挺元與馮時泰結姻據鴨埠水行劫商賈不通殺任經之族七十三人並生員何龜廻岐司張明紳周鳳翔兩巡檢三水四會均

受害冤民迭控撫按遣兵追捕二人竄身尙藩兵籍中殺掠如故康熙元年任經子身叩闈奉

敕交刑部行廣東巡按嚴辦讞定朱挺元馮時泰及夥黨數十人依謀叛不分首從皆斬決二人妻妾子女給功臣家為

奴財產沒入官盜賊始息據清遠志修白炯中由諸生貢入成均歷任光祿寺署丞有能聲暑時父

為賊所害冒險詣賊巢購櫬而歸我朝定鼎委修礮臺雉堞有功順治九年舉孝廉人以為不愧

大典平居誼篤桑梓凡修學賑荒施棺周急皆力為之初順治辛丑秦王山鐵爐廠聚眾流劫大為民害炯中籲請當軸

撤爐康熙四年遂止之據郝通志修榻庭芬居家孝友巡按張問政督學錢朝鼎先後顏其門康

熙元年充甲首督通糧遇盜死急公殞身人咸哀之祀鄉賢據阮通志修

徐彪字可紀雍正元年癸卯舉人授湖南瀘溪縣勤撫字彰教化案無留牘尤加意義學捐俸延師時進生童親為講解

文風丕變瀘溪有旱田有水道可作天車以資灌溉惜縣人不知其法僱本縣善為天車者往教之自後收成數倍又修

城垣葺學宮政聲卓著涖派溪二載委署阮陵事以年老解組歸瀘溪勒去思碑焉據清遠志修

朱澧字連渭父大裕恩貢始興教諭以孝友聞年八十四卒澧膺乾隆四十二年丁酉拔貢廷試一等充武英殿校錄官

丁內艱歸服闋仍充校錄期滿選連山教諭旋丁外艱服闋歷署電白鎮平樂昌學官補長樂教諭廉以持已勤以誨人

廣州府志 卷一百三十六 列傳二十五 尚

十餘年間振文風端士習卓有賢聲解組歸長樂人思其德奉祀德政祠生平于當道鉅公卽同年素好未嘗干以私總督那彥成札詢地方形勢民間疾苦條對數千言皆切中時務那得書大加獎許語山長邱先德曰文士胸中有甲兵信哉酷愛名人法帖寓京邸日與張錦芳馮敏昌陳昌齊評品

石刻真贋立辨卒年六十九

據清遠志修

郭儀長字豫堂少有大志由附貢生中乾隆四十八年癸卯順天舉人歷任刑部主事員外郎郎中曹務繁冗常恐有失囚有死罪法不能貸則惻然不安轉江西道御史巡視北城所陳奏如禁洋之貿易察汛兵之畏縮悉中時弊又以船戶被掠許報名存案拿獲時訊係逼脅與原報相符准予保釋嚴飭官吏諱盜為竊嚴懲頑民糾黨械鬪明解餉收兌例限

以止部吏留難禁搜衣箱以杜蘆溝橋役恣肆皆報可尤能急人之急官京師二十餘年同鄉之死喪無歸者必為之經紀其事嘉慶元年與千叟宴

賜碧玉如意靈壽杖錦緞大緞

御製詩章時方嚮用以姪見晟會試病歿京邸卽請假回籍名卿大夫道經清遠皆聞名造訪邑中凡修學宮賑飢民修橋路靡不竭力倡舉焉卒年七十九

據清遠志修

程尙德由行伍拔補南雄協把總嘉慶元年領兵從征湖北教匪以奮勇殺賊功

賞戴藍翎擢三江協左營千總己未蜀寇滋擾復領旗兵進勤至雲臺山力戰陣亡奉

旨優卹入祀昭忠祠世襲雲騎尉恩騎尉罔替

據阮通志修

郭鍾熙字載榮道光元年辛巳舉人挑授廉州合浦訓導兼署欽州學正丁內艱歸王邑書院講縣中登科第者多出其門爲人勇於任事事關桑梓尤不肯推諉道光二十九年土賊胡黃毛五周華擾英德清遠界鍾熙倡聯咸泰約合高田鄉各處捐資團練設防于橫石賊不敢窺賊平議叙如同知銜戴藍翎咸豐四年七月紅賊練四苦陳金缸等陷縣城知縣程兆桂退守濱江鍾熙由魚嘴墟往見圖克復是時捕屬及潛江濱江廻岐皆有團練鍾熙爲衆望所歸各約俱願聽約束遂定于五月初二復城鍾熙率鄉勇力戰賊敗走鄉勇入城迎程令住端峯書院叙功加運同銜換花翎六年十一月賊目練四苦陳金缸復圍縣城西河一帶俱爲賊踞七年正月初一日賊渡河至洲心大巷口等處勢甚張十三

日賊敗退守西河朱岡司張清鑑帶湘勇勦捕鍾熙率鄉勇引導由江口過橫石殺賊百餘賊竄濱江縣城圍解加三級封贈三代同治四年正月開局倡修縣志八月補授德慶州學正莅任數月以病歸卒

據清遠志修

郭志融道光甲午舉於鄉乙巳成進士以知縣用補四川大邑令摑賊猝至率壯勇夤夜據險堵截出賊不意斬殺甚多鏖戰一夜始與營兵合擊賊以敗退自是不敢入其境上官知其能調補成都大邑民感其德競爲生祠尋升叙永同知署潼川府總督奏四川官吏能軍者惟志融一人擢安徽安慶府咸豐三年丁內艱歸服闋補揚州府未赴任六年逆賊數萬圍攻清遠縣城兵寡餉乏乃赴省具呈請兵復借銀萬餘兩回縣守城七年春解縣城圍赴揚州任是時廣東省洋

務起

上命在籍侍郎羅惇衍太常寺卿龍元僖給事中蘇廷魁總辦防勦事兩廣總督黃宗漢素知志融才奏為隨員辦理洋務時總督駐惠州府羅龍蘇駐花縣志融往來商議調度及京師和議成乃回江蘇署蘇州府事政務紛繁又因金陵賊逼力竭神疲遂得病及

特旨升授徽甯池泰安兵備道加按察使銜而志融已不起家人扶柩出上海而蘇州陷矣方將大用年僅四十九而卒朝野惜之志融性豪邁無文士習氣初未學詩道光二十一年會試下第歸途感事擬杜甫諸將詩見者以為逼真由是肆力學杜有詩草一卷悲壯淋漓一時之傑也子香祖戶部

主事

據清遠志修

馮應鏞字玉笙少孤事母吳敬謹好讀書以功名自負終母喪後宦遊西粵初任隆安縣政簡易永康賊起調署州事家人憂之曰事不避難人臣之分也陰選壯士兼道而進到任即分兵守險下令清野親帥鄉勇勦捕等遷太平府賊氛甚熾妻溫男國勳等勸求退曰吾以身委國義不容辭令妻子回家留妾李氏隨任後于新甯州被圍數月遂遇害妾李氏殉焉歐大彪字虎臣由營伍記委補武生性剛果咸豐甲寅七月賊攻縣城人心惶惶大彪請出城力戰奪賊志以固眾心守備賴明貴叱之退城陷被執見賊首薛發直立不跪厲聲罵賊遂遇害棄屍河中事上贈卹如例郭志信字涉濤詹事府主簿銜咸豐四年逆賊陳金釭練四苦巢閩章朱水等陷城林大年偽知中宿縣何耳為偽都督擄志信入城勒贖

並逼入黨志信不屈遇害事聞給雲騎尉世職據清遠志修以上清遠

何靈運號玉書東莞伯何真之後順治八年辛卯舉人質實

淳慤坦易慈和與物必誠不設府好詩酒往往以此寄志初

任高州府茂名教諭捐俸課士斯文生色故于其陞也諸生

尸祝不衰迨秉鐸循州學田所人恒分以周寒士學使馮大

嘉獎之飛章首薦內轉國子監學正晉兵部督捕司務以年

老告歸惟以詩酒自娛焉據新安志修

陳雋蕙字仲之順治十一年甲午舉人十八年辛丑進士性

灑落不羈輕財好施生平布衣之交貴而彌篤候選于家適

值遷界居民失業率父老力懇上臺設立歸德場口子竈丁

腰牌使得出界晒煎存活一方邊授河南衛輝府汲縣知縣

地苦衝疲潔已愛民口碑載道及解組日行李蕭然士庶爭

釀金錢贈之據新安志修

鄧文蔚字豹生錦田人順治十四年丁酉舉人康熙二十四

年乙丑進士少貧力學為文敏捷嘗混跡漁樵以助菽水而

行吟不輟道旁嘗聞諷誦聲初鄉薦北上未售歸即陶情山

水二十餘年至壬戌復遊燕館于冠軍將軍倪家都下名士

多從之遊逾三載捷南宮授浙江龍游縣惜之任未久而卒

據新安志修

溫澤字字上汲邑之西鄉人幼聰雋見賞于東莞張家玉迨

長遍覽羣籍邑中欽其宏博以易經中式康熙二十九年庚

午舉人邑侯丁棠發延王寶安義學講席知名士多從之遊

任崖州學正題陞瓊州府教授未任卒時年七十七著有四

書纂要六卷易經精叅四卷羣書輯要五卷據新安志修

陳景芳字嶺光乾隆六年辛酉舉人十三年戊辰進士即陳雋蕙之裔孫也少聰敏學極淹博邑學宮向為僧人盤踞乃毅然屏逐之生平接物虛已下人後捷南宮持躬尤謙謹論者謂其禮教淵源有自來也未仕而卒

據新安志修

江士元字參宋邑之大浦浦人乾隆壬申舉人甲戌進士儻不羣過目成誦制藝尤雄渾有大家風格當其肄業粵秀時嶺以南知名士靡不重其品而傳其文惜未仕而卒

據新安志修

賴恩爵字簡廷大鵬營人父鷹揚字虎臣嘉慶十八年由千總隨提督舟師勦賊抵儋州新英外洋獲賊船十八艘生擒烏石二等四百八十人自是遂知名粵督百齡奏洋面肅清賞給頭等出力銀牌道光七年補平海營叅將十八年授浙

江定海鎮總兵凡九十餘戰捕獲一百二十人性至孝以母劉年逾八旬告養不允旋接母訃哀毀成疾卒叔信揚由行伍歷任福建水師提督恩爵少隨父任陽江補陽江伍十八年補海門營叅將時啖人販鴉片歐斃民人林經喜抗不交兇粵督林則徐札恩爵領師船三號守九龍寨嚴斷接濟七月啖酋義律統大小洋船五以求食為名猝施礮轟擊恩爵麾各艘及礮台弁兵還礮碎雙桅洋船二啖人暫退頃之復來則以船橫截鯉魚門復率礮船來助勢極洶湧恩爵奮不顧身擊斃啖兵三十餘人礮斷啖目得忌刺吐手腕兵酋傷者甚眾啖人遂退尖沙嘴事聞

賞呼爾察圖巴圖魯名號戴花翎即授副將義律被創逃仍負固尖沙嘴疊次騷擾皆隨時擊退恩爵復帶兵移住官涌

分五路進攻計擊沈雙桅洋船一划艇旬日間大小接仗六俱獲全勝洋船乃退粵督奏恩爵於外洋情形最熟其營道近香港經理彈壓輕重得宜授南澳鎮總兵廉瓊洋賊復熾督拖船四十往勦降賊四百二十八人禽馘土賊九十五人總戰功二十升廣東水師提督卒據李紹昉撰行述采訪冊修劉起龍字振升由大鵬營入伍嘉慶八年授平海營右哨把總道光三年仕至南澳鎮總兵六年擢福建水師提督時洋匪為患商船居民咸苦之起龍起偏裨以至專閩前後十八戰獲二百三十一人擊沉賊艘及獲礮械無數入

覲備荷

恩綸旋閩踰月巡南北洋卒

據倪琇琪撰行述修

會榮邑之新橋人其父天祿曾任江南川沙營參將庭訓最

嚴榮亦以忠勇自負由行伍歷官至游擊常隨總兵黃標提督孫全謀巡洋捕盜屢有戰功署南澳海門參將聞福建賊船入境帶舟師一晝夜追勦八百餘里至閩省廈門之燈火窄斃賊甚多後因捕盜出洋風勢猛烈眾兵力勸返棹榮喟然曰賊匪當前因風而退其如職何堅不聽頃刻颶風暴至船乃覆屍亦漂流不可得大憲以屢著勞績奮不顧身入奏著照參將陣亡例優卹蔭其子雲騎尉世職卒年僅三十餘

歲據新安志修以上新安

黃學倫字肖元花縣岐山人甫七歲而孤母曾氏誓死不嫁撫以成立及長每以嚴親未得終養為憾事寡母孝養備至母歿飭粥三年哀毀骨立居鄉以仁義訓子弟化隣里故自花山猖獗以來鄉人無一挂公議者皆學倫教也時賊肆劫

被掠不可勝計凡有從賊中逃出者即投司給粟送以甯家
其入山購贖者屢不絕行者無依學倫備薪米於本村祠
中使得食且議鄉夫防守行李無虞老病者必慰安調養而
後去以故遠近被難之眾咸目岐山為仁里云卒年八十九

子士龍據張府志修

黃士龍康熙十一年壬子舉人先是花山隸番禺從化界明
季巨寇據為盜藪劫掠鄉村流毒行李朝議屢經征勦而兵
來賊去兵去賊來失業逃亡者將五十年時則康熙二十二
年也士龍目擊其狀怒焉傷之上書大憲陳勦撫之方倡議
建縣大憲允之並令王永名來知縣事於是開山埋谷鑿石
填坑城垣衙署一律創建遺黎復業者給以牛種耕鑿復
興焉以選授蒼溪縣令簡賦恤民興學造士頌聲遍閭里卒

於官康熙四十一年邑人呈請與知縣王永名分祀名宦鄉
賢據阮通志修

宋衍字鳳翅性孝友少居程鄉嘗以兄事逮獄捶楚累年州
牧憐而釋之父病衍禱天請代母患目衍舐之旬日復明及
病篤醫藥罔效衍嘗糞以測病源夜夢神人授以方一飲而
愈人以為孝感所致居喪廬墓三年朔望赴墓悲號聞者心
惻總督託恩多巡撫李侍堯旌其閭曰孝友可風據阮通志修

劉斌全字長安高祖立漢官副將世以勇畧聞斌全由行伍
補提標把總乾隆丁未臺灣林爽文寇嘉義縣斌全率精卒
四百解其圍越日欲進兵遇大風雨斌全力請札營帥執不
可遂孤軍冒雨抵賊巢礮藥盡濕無所施斌全奮勇殺賊數
十馬蹶蹶被執不屈死嘉慶八年祀昭忠祠子輔朝侍朝俱

龔雲騎尉據阮通志修

駱秉章原名俊後以字行一字顓門始祖達元唐時自浙江義烏來居南海之烏石岡明末有諱產者遷居華嶺康熙二十四年析南海置花縣遂為花縣人曾祖浩三祖逢父翊元皆贈光祿大夫秉章生而端凝力學不倦見者知為大器年二十二補弟子員嘉慶己卯舉於鄉道光壬辰進士改庶吉士十三年散館授編修十五年充國史館協修十八年轉江南道御史掌江南道奏參北新倉花戶挪移厥座風采始著二十年春充會試同考官秋充順天鄉試同考官兼掌四川道稽查戶部銀庫庫故弊藪而捐款為尤甚故事百金加四兩久撥充公後再增四兩半入稽查官而庫丁之弊遂不敢詰秉章拒不受當收捐日坐堂上躬自閱兌庫丁大窘不得

遲二十二年擢工科給事中二十三年遷鴻臚寺少卿五月擢奉天府府丞銀庫事發褫職罰賠門生戚友知其冤助以賞完繳

詔以庶子用時同罰者皆用主事秉章獨得宮僚召

見復蒙

溫語蓋

上深知其清正不阿可任大事也二十四年補右庶子充日講起居注官

特旨命往山東查辦事件二十五年以憂去官二十八年服滿入都再奉

旨按事河南山東江蘇擢翰林院侍講學士十二月授湖北按察使二十九年四月擢貴州布政使湖督裕泰奏留湖北

署布政使事會江水浸省城日登陴堵塞又發帑運米以食
結棚以棲災民全活數十萬七月調雲南布政使三十年

文宗踐祚擢湖南巡撫是時長髮賊洪秀全反廣西據永安
官軍屢敗

朝廷遣重臣視師道湖南以供帳簿劾秉章吏治廢弛元年
詔回京未及行而賊已犯桂林出郴桂道茶攸以犯長沙先
是長沙城圯損秉章至即議修城方訖工而賊至賊目蕭朝
貴詢知城壞以爲可唾手得及至乃大驚率眾撲城斃於礮
八月新撫張亮基至秉章已交印

詔暫留九月各省兵援廣西者皆回長沙洪秀全全隊亦至
秉章見南城單薄亟請調提督鄧紹良守城賊穴地用火藥
轟城陷者十餘丈我軍且戰且堵城遂固十月賊順湖東下

所至無堅城武昌漢陽九江安慶江甯相繼淪陷而長沙獨
完秉章之力也十一月

詔幫辦湖北軍務三年正月署湖北巡撫八月仍補授湖南
巡撫蓋効之者方得罪

上愈知其能至此始畀以湖湘之事當是時賊據江甯分兵
徇江西武漢雖暫復勢所必爭崇通咸蒲土賊出沒則岳州
爲重鎮非水軍東下無以扼上游而制全局非陸軍出岳州
無以固武昌之後時湘勇大集經侍郎曾國藩訓練成軍國
藩移駐衡州以部曲見屬推誠相與咸樂爲用遂先清東南
以圖大舉四月破江西上龍之賊於桂陽六月殲廣西恭賀
之賊於永明零陵江華七月破廣東樂安之賊於興甯八月
破江西太和之賊於茶陵至冬而常甯永興土賊皆盡境內

廣州府志 卷一百三十一
以定四年正月湖督吳文鎔戰沒於黃州之堵城漢陽復失
賊以水軍犯岳州湘陰爲我軍擊退三月乃大治舟師濟國
藩東征師抵岳州會游擊塔齊布敗於蒲圻之羊樓司賊麋
集岳州會軍失利賊以水軍據靖港登陸由甯鄉進陷湘潭
省城大震秉章調諸將塔齊布楊載福彭玉麟等水陸軍回
援國藩統之大戰於湘潭十戰十勝五月克復縣城殺賊殆
盡靖港賊棄岳湘由西湖繞陷華容龍陽常德而崇陽通城
亦道阻秉章乃奏調貴州候補道胡林翼辦西湖之賊命塔
齊布及羅澤南各軍由岳州以取崇通未幾各城皆復故六
月武昌再失而十月國藩師至旋即克復破田家鎮以下九
江塔羅二軍亦盡破沿江賊營與國藩軍合十二月國藩失
利於九江退守鄱湖五年二月湖督楊需敗於黃梅武漢復

陷時胡林翼已署鄂撫飛書告急秉章先令游擊鮑超率舟
師先下彭玉麟募勇繼之起楊載福於家統其眾北路稍固
而南路賊大至先則廣東賊何祿陳金剛由樂昌以犯宜章
郴州繼則廣西賊朱朝英胡有祿出全州以犯東安同以四
月失守而邵陽武岡黔陽溆浦土賊紛起秉章飭田興恕諸
軍堵廣東之賊以王鑫諸軍擊廣西之賊以劉長佑往視師
先清各縣土賊七月克東安斬胡有祿廣西賊遁乃回軍合
勤而東賊已陷桂陽永興茶陵各城九月軍至分克茶陵桂
陽賊遁入郴州而宜章先復十一月進攻郴州斃何祿於陣
州城亦復西賊復陷永明郴賊竄陷江華皆隨時擊退南路
以定時胡林翼潰於金口羅澤南由義甯入鄂赴援破通城
崇陽以進賊黨僞翼王石達開率大隊來爭互有勝負而羅

澤南已直下蒲咸與胡林翼會師攻武昌崇通復失而賊銳亦挫我軍退扼平江賊遂折入江西至是而北路亦定江西自三年被賊袁州先失石達開既至連陷瑞州臨江又南撲吉安東出撫州建昌屬城多陷秉章以境內大定銳志東援先令道員江忠濟一軍出通城以固岳州乃以劉長佑劉坤一蕭啟江等率軍入江西先定袁州之境六年二月復萍鄉四月復萬載會江忠濟戰沒於通城諸軍不進更令王鑫統兵往援崇通次第克復而劉軍亦於十月克信宜以復袁州事聞得

旨有不分畛域極力圖維之語

賞戴花翎七年鄂軍既復武漢下游無警湘軍可四出則籌餉爲亟先是部議鑄大錢班鈔以給軍秉章令長沙府開局

試鑄私鑄日出民洶洶欲罷市秉章亟收回大錢廉府局私鑄者論如法寢鈔不行事乃定又四五年間漕務不通湖南穀賤石僅三錢完漕則石六兩而上民困正供坐缺乃採舉人周煥南議石減其大半輸將始足額至是復奉部議設卡收鹽貨釐金秉章專用土人司權嚴杜中飽每年入百數十萬餉以大裕故其時入黔之軍既克松銅錦永各城先後遣諸將兆琛等赴援軍留於黔而黔有餉廣西賊陷興安靈川楚粵道梗又遣蔣益澧赴援軍留於粵而粵有餉且江藍柳桂毘連兩粵賊至則迎擊去則越追常須裕軍於邊而湘有餉秉章飛芻挽粟調發裕如遂得以全力援江右是年春遣道員趙煥聯諸軍分出茶陵桂東以濟師劉長佑遂進兵克新喻上高進迫臨江賊懲武漢之敗援軍大至又調王鑫督

師截勦克復樂安八月王鑫卒於軍以同知張運蘭王開化分統其眾大敗援賊十二月劉長佑復臨江八年京察以功賞加頭品頂戴自克復臨江劉長佑遂請假以劉坤一領其軍令由新淦取崇仁以窺撫州張運蘭既敗賊令以其軍趨永豐取宜黃南豐以窺建昌自春及夏各城皆復八月諸軍齊集石達開敗竄浙江遂復吉安是月也故浙江布政使李續賓既復九江進兵安徽賊困益謀東犯浙江告急秉章奏起復國藩督師援浙留蕭張兩軍隨征江西之師遂盡撤蓋自五年援江西糜餉二百六十萬協濟尙未預焉石達開既敗入浙不得回金陵竄閩出粵徘徊五嶺之上九年春遂由江西之崇義以入楚秉章聞警先調兵赴桂陽與郴勇相犄角調知縣魏喻義陳士杰扼歸河以水軍截湘江之耒河口

起劉長佑於籍與劉坤一募軍四萬備迎擊調蕭啟江張運蘭由江西回援調田興恕由貴州回守寶慶軍未集而賊至兵少不敵賊陷桂陽宜章甯上犯郴州分陷桂陽州欲竄衡州我軍扼歸河不得渡賊遂回竄陷嘉禾犯新田撲臨武走甯遠石達開親率大隊竄祁永以據上游秉章令劉長佑劉坤一先後出祁陽截擊副將王明山移水軍上扼湘江以顧衡州劉長佑軍至祁永與賊相持賊棄永州趨湘江不得渡回陷東安撲新甯四月劉坤一軍亦至再戰再捷賊遂以全軍趨寶慶時趙煥聯等援寶慶已至田興恕亦自黔至皆營於城外秉章下免死令散賊六七萬人而賊眾尙二十餘萬環營二百里包各軍於圍中勢且急會鄂撫胡林翼遣李續宜以湘軍赴援秉章令由北路之新化以入飭劉長佑諸

軍由西路副將何紹彩諸軍由東路道員劉嶽昭諸軍由東北路密飭援寶各營合擊以鄂湘水師分扼資沅遏其軼六月諸軍並進大戰寶慶城下內外夾攻賊大敗死者數萬人焚賊營六十五卡百三十七月賊收殘軍撲營復大敗連夜東竄至永州遇蕭啟江回軍又敗之賊遂由全州入粵秉章飭蕭啟江督軍尾追而劉長佑統全軍繼進兩軍先後至敗之大榕江又敗之桂林至九月賊竄慶遠桂林圍遂解秉章以石賊未殲必思由黔入川飭劉長佑留全軍鎮粵田興恕回黔以期截勦而是時粵東西賊又出擾邊乃使知府黃瀆熙擊西賊於江華斬其渠使張運蘭擊東賊於宜章追至連山廳掃其穴方撤兵回湘而川事孔亟十年七月詔入蜀視師乃以劉嶽昭黃瀆熙二軍隨行交印待發而石

達開自上年冬由富川竄粵東之連州至是折回分黨犯永明自率大隊由融縣入楚綏甯城步相繼失吏民乞暫留秉章兩軍會勦賊由五嶺竄江西之崇義撤軍回楚遂啟行時十一年正月二十日也師抵宜章聞賊曰偽英王陳玉成由皖竄湖北黃德隨孝皆失乃分遣劉嶽昭援鄂檢所部得五千人遂整軍入川四川經亂以來傷殘殆甚賊首李永和卯得興久據青神藍朝鼎進圍綿州蹂躪四十餘州縣將迫成都而張第才何國樑方圍順慶道復梗秉章以四月抵萬州念不破賊進必襲吾後乃悉遣軍登陸飭黃瀆熙為前部兵至順慶圍解追敗於定遠獲何國樑瀆熙進擊張第才遇伏戰歿而賊亦敗遁六月抵順慶以同知曾傳理統瀆熙之眾增募餘丁為楚軍令在籍道員張由庚別募川勇為川軍時

藍賊圍綿急知州唐炯以蠟書乞援秉章咨四川提督蔣某以兵綴青神咨署川督崇實飭總兵胡中和以湘果營軍分爲三逕擊賊壘飭張由庚等新軍分扼東北以防軼助勢定於八月初一日會師七月進潼川命副將唐友耕諸軍由南路合勦部署既定旋奉

命補授川督至期我軍齊集綿城下賊大敗死者數萬人賊壘盡平會大雨收軍賊復渡涪水結營十四日以浮橋濟師衆軍合擊賊又敗由什邡竄崇慶官軍追敗之賊遁入丹稜九月十五日遂移節進成都受任莅事是時川中賊尙多周紹湧匿涪州張第才竄陷新甯秉章念不驟擊藍李恐合而勢盛不分勦餘賊又東北可虞乃令總兵周達武以湘軍擊周賊於涪張由庚以川軍援新甯分遣唐友耕扼眉南之洪堰以綴李賊咨蔣提督以師至會諸軍圍丹稜設木城節節進逼賊棄城遁追斃藍朝鼎於陣遂克丹稜李賊見丹稜已失結筏欲東走我軍擊之竄而西秉章咨蔣提督圍青神餘賊飭諸軍追李賊圍之於鐵山同治元年

穆宗卽位以勦丹稜功

賞加太子少保銜是年三月克復青神九月由鐵山追賊至宜賓李卯二賊悉獲事尋定而東北諸軍張由庚克新甯賊分隊走惟張第才走陝西之定遠廳曹燦章由大竹遁老林幸免脫周達武至涪追獲周紹湧於大竹郭刀刀由定遠竄甘肅復追獲於巴州凡自二月至十二月藏事時劉嶽昭先自楚至合諸軍備防川東內地晏然遂以無事石達開之再敗也往來黔楚之交銳意入川自元年正月窺川中方用兵

由黔之廣順竄陷湖北之來鳳利川入陷石柱廳城進撲涪州劉嶽昭軍至賊敗分軍竄黔之桐梓而自攻綦江窺內地有備繞黔越之仁懷入踞叙永奔興文攻江安陷長甯珙高慶符皆遭蹂躪既敗入滇分兵竄筠連高縣我軍扼金沙江賊駐橫江夾岸築壘以守十一月進破之復竄入滇約三路入川以賴裕新先進而石達開從滇入李復猷從黔入同時並舉使我不能兼顧二年正月賴裕新自甯遠入竄冕甯至越嶲為邛部土司嶺承恩擊斃餘賊無主涉大渡河內走凡經榮經天全大邑崇慶温江郫縣灌縣崇甯彭縣什邡三台江油躡川西者幾半或遇官軍擊敗或遇鄉團截殺至平武縣之雁門壩所餘無幾盡殲之山谷中秉章知石達開必繼至先飭劉嶽昭留軍川東以待李賊而速調諸軍回戰飭雅

州知府蔡步鐘以鄉練扼大渡河飭暖帶密土司王應元以土兵扼松林小河谷胡中和扼化林坪為聲援調副將謝國泰馳赴磨西扼打箭爐之路飭嶺承恩以土兵扼越嶲迫賊入夷地而抄其後調回湘果營蕭慶高何勝必兩軍馳赴榮雅以防奔逸各軍既集石達開於三月二十七日由冕甯小路逕趨松林土司之紫打造筏渡河會大雨水漲官軍擊之於半濟筏盡沉賊轉撲松林小河王應元扼河力戰賊又敗四月十二日都司慶吉會邛部土兵夜襲取馬鞍山斃賊數千石達開復撲兩河皆為官軍擊退糧道盡絕殺馬及樹葉以食二十五日官軍會攻紫打土練從山頭壓下賊不支奔至老鴉旋河輜重盡失石賊妻妾五人抱幼子二人投河死賊黨紛紛出降石達開父子遂率眾降散脅從四千殲悍賊

二千縛石達開父子至成都磔於市時五月初十日也事聞以調度有方晉太子太保銜其李復猷一路亦於三月同時舉事由黔之婺州正安竄入彭水劉嶽昭合黔軍迎戰敗之於周家寨又敗之於梅子坳賊走湖北我軍逾酉陽追敗之於咸豐秀山賊遁至麻陽爲湘軍所殲石賊之黨遂絕四川大定而髮賊僞昭王蔡倡齡僞啟王梁成幅尙據漢中至是有

詔派兵遂以萬三千人入陝而合劉嶽昭駐酉陽與胡唐諸軍分扼叙永綦南彭涪各路劉嶽昭之入黔滇自此始矣三年京察從優議叙六月江甯克復追叙前功

賞一等輕車都尉世職換戴雙眼花翎是時已得日疾而漢中髮賊復竄甘肅之階州增兵濟餉軍事火急故雖請假仍

視事我軍復有松潘馬邊之捷先是松潘番婦額能始自咸豐十一年攻踞廳城將并茂州秉章至蜀卽飭鎮兵謀進取元年茂州知州蹇閻克疊溪營二年進破梭磨土司之石碉樓遂復廳城誅額能始自疊溪至漳臘三寨皆已投誠惟南坪逆酋歐利哇尙負固四年五月我軍克復階州蔡梁之黨畢獲秉章令諸軍盡撤獨留周達武一軍由甘肅之文縣入八月拔紫關進取南坪歐利哇震懼率三十六寨降附近之大小水田寨康隆七寨亦降進勦窩各八寨巖裏四寨竹咱一寨皆獲大勝和葯九寨羊尙前山八寨後山五寨邊山七寨關外五寨望風乞降周達武馳至廳城會文武集諸番示以禍福誅其不用命者松潘悉定而馬邊廳逆首宋仕傑者始以邪術惑衆於五年九月遂反先分兵擾屏山之杉樹岡

使賊黨熊汶才至洪雅勾結土賊約初九日燒走馬場而宋賊於二十日攻馬邊廳城與相應秉章聞變派兵赴洪雅咨胡中和取道屏山勦捕飭周達武由犍爲進搗廳城我兵未到而洪雅屏山已爲兩縣官兵勦敗宋賊盡銳攻城分兵走嘉定周達武至先敗其分兵進勦圍城之賊十月以兵搜各巢賊黨盡獲而馬邊廳亦平川南毘連黔滇邊防數千里賊窺邊無虛月防兵不足須賊至乃迎擊閒威以鷓鴣至卽旋師故雖捷音屢奏恆以深入爲難秉章念綏陽遵義實通黔省此路不復則黔滇坐失自四年遵義被圍卽以劉嶽昭統師出境以期掃蕩五月復正安進克綏陽之天台山時遍地賊氛軍不得進遂先後濟師分軍攻鞞尖山之賊以絕牽綴又分軍擊上坪四面山之賊以絕應援五年拔鞞尖山軍威

大振環城各鄉皆反正至六年正月賊首吳元彪出降綏陽克復大軍遂抵遵義由黔西大定節節掃蕩黔路以通今官軍由黔入滇收復兩省皆秉章遺策也秉章在告解任仍畀以軍務至是疾愈視事五月遂有協辦大學士之

命議者援鄂爾泰故事請秉章節制三省以復黔滇

上不允猶令其議秉章奏言黔不患無兵而患無餉尤患將帥收合不得其人民未從賊旣苛派而魚肉之被脅來歸更抄沒而株累之民窮無告遂相率而爲賊現黔省尙資川助劉嶽昭必俟黔省底定乃可赴滇而治黔之法惟先辦號匪招撫苗匪慎擇良吏以培元氣並劾楚軍不得力須別募新勇以通荆竹園一路薦前貴州按察使席寶田材武可用上皆允其請會京師亢旱秉章深維根本力以通洋舶之米

廣州府志卷之三十六

三十一

移盛京之粟為言憂

國之謀老而彌篤而疾愈不可為已以同治六年十一月十七日卒于節署遺疏入

諭曰協辦大學士四川總督駱秉章忠誠亮直清正勤明由翰林洊擢卿階以廉介持躬仰蒙

宣宗成皇帝特達之知先後

命赴山東河南等省查辦事件旋簡授臬司擢任封疆在湖南十年練兵訓士甄別人才東南巨寇賴以殄滅復荷

文宗顯皇帝知遇

特加頭品頂戴以示寵眷嗣

命督辦四川軍務朕御極以來卽擢授四川總督統軍入蜀賞罰嚴明所向克捷滇粵各匪悉數殲除並越境攻克甘肅

貴州各州縣因石逆被擒川省肅清論功行賞晉加太子太保銜旋以江甯克復東南掃蕩念其昔在湖南任內識拔將帥先振軍威忠蓋咸孚勲勞素著復賞戴雙眼花翎賞加一等輕車都尉世職本年夏間簡任綸扉老成碩望方冀克享遐齡長資倚畀昨因舊疾復發賞假調理遽聞溘逝披覽遺章良深震悼駱秉章着追贈太子太傅銜卽照大學士例賜卹任內一切處分悉予開復應得卹典該衙門察例具奏並加恩予諡入祀京師賢良祠併於湖南四川兩省建立專祠其生平政績事實着宣付史館伊子駱天保着賞給郎中服闋後分部行走駱天詒着賞給舉人服闋後准其一體會試伊孫駱懋湘駱懋勤駱懋仁駱懋勳均着交部帶領引見伊姪孫候補縣丞駱肇銓着以知縣分發省分卽補其靈柩回

籍并着沿途地方官妥為照料用副篤念蓋臣至意欽此葬賜祭葬諡文忠秉章外樸內明能鑒別真才以得其死力王鑫微時請募兵三千赴援湖北既資以餉會吳文鎔中蜚語遂止不行秉章信任無疑卒收其用湘陰舉人左宗棠負才不可一世秉章羅置幕府襄贊尤多凡所識拔多起自營弁布衣及提軍四出當時即倚以辦賊名臣良將布滿天下其機實秉章發之也以楚南一隅備籌全局援鄂援江援粵援黔助饟分軍不分畦畛獨遣將不相遙制故出境各以功名自見而已反無赫赫勲追統軍入蜀兵非練兵將無宿將運籌帷幄之中發輒破的用能內靖萑苻外摧巨寇北定秦隴南拓滇黔使上游財賦之區克完疆圉觀蜀事而後知其將畧徒稱以知人善任未足以盡之也勲猷既樹委化順歸巷

哭衢哀蜀人喪之七日靈舟東返湘人臨江哭奠前後相望

論者謂其功德在人實不愧古大臣云據李光廷撰行狀修

宋維屏字建侯佳錦山人道光癸卯舉人乙巳進士出宰安

徽充丙午科同考官補五河知縣咸豐二年調蒙城當是時

髮賊由粵竄楚破江甯分兵四出淮潁之間處處蠢動維屏

星馳抵任練民兵為守禦計三年賊大股北竄巡撲縣境維

屏督兵出境堵勦眾寡不敵死之同時死者族弟宋維熾宋維燮宋維翰家人翁養吾

翁養汝練總拔貢陶成監生葛祖合勇目馬佩等同日陣亡賊破城署內婢女添福添富皆遇害

事聞諭曰蒙城知縣宋維屏督兵勦賊身被重創以致陣亡不愧

守土之官着交部從優議卹旋加贈知府給雲騎尉世職同

死宋維熾等與僕從女口一併照例賞卹云花縣自康熙設

縣以來科第以宋氏為盛并附於此魁文字鰲以乾隆庚子

廣州府志卷一百三十一
舉人瓊山教諭健文乾隆丁酉拔貢新陽知縣灝字田溪嘉慶戊辰舉人以知縣分發四川歷署綦江蓬溪江津知縣補新津充辛亥科同考官擢直隸州澍字萼樓道光乙酉拔貢戊子舉人乙未以知縣分發山東歷署陽信濰縣博平高密昌邑膠州各屬補海豐調掖縣以防堵功擢同知皆佳錦山人灝與澍更有著述藏於家云據采訪冊修

宋蔚謙字抑臣佳錦山人父廷楨字金甫嘉慶甲子副貢戊辰順天舉人己酉進士出宰四川歷署營山秀山岳池內江知縣補汶川調富順戊寅己卯乙酉同考官著有一根堂文集臨顏寫心錄藏於家蔚謙道光庚子舉人咸豐壬子進士以主事籤分刑部三年回籍四年土賊蠡起縣城失守大吏檄蔚謙團練獲番禺逆首甘仙解省正法五年夏督勇同本

縣張令收復縣城六年鄰賊由清遠犯縣西鄙官兵屯於聯平蔚謙督六局勇目武生鍾灝等屯於國泰七年餘賊聚于濶江大吏命張令會清遠從化兵合勦而蔚謙督勇先行正月中旬札營官莊低田村從化清遠兵久不至蔚謙遂進兵二十二日遇賊於關前賊大敗我師乘勝深入蔚謙方督後隊進忽賊回竄見我兵少遂來撲蔚謙死之鍾灝慷慨赴鬪亦陣亡事聞蔚謙贈道銜給雲騎尉世職入祀京師昭忠祠本邑建專祠鍾灝亦給世職如例附祀焉蔚謙叔廷桂道光丙午舉人咸豐十年授江蘇金壇縣知縣據采訪冊修以上花縣

南海李徵爵分纂

番禺史悠履初校

番禺史悠乾再校

番禺金佑基三校

南海顏以湘四校

廣州府志卷一百三十六終

廣州府志卷二百三十七

列傳二十六人表

程勉

永樂舉人江西理刑權監察御史

林貴

字良貴成化進士授館陶令

邱秉忠

成化舉人福甯州學正

吳允正

字天祐宏治進士應廣西參政

羅列

字天爵宏治進士應福建參政

蘇民懷

字子仁舉人朗甯太守

何珖

宏治舉人應梧州知府

吳宗湯

字允相正德舉人桐廬知縣

曾儲

字元秀正德舉人知橫州

蒙學之

字念嘗嘉靖舉人官瑞昌知縣

馬驄

字桓威嘉靖舉人古田教諭

關玉成

字山仰嘉靖舉人知仙遊縣

梁紹勳

字懷之舉人應任遂平縣

馬拯

字壯輿嘉靖進士工部主事

陳棐

字晉伯嘉靖舉人任太和令

梁士介

字石灣嘉靖舉人任大治縣

孔志道

字用仲嘉靖舉人授趙州牧

潘鵬舉

嘉靖舉人知蒼梧縣

陳彥際

字道章柳州教授子貴封中憲大夫

張守謙

字斯豫隆慶舉人應大甯縣

廣州府志

卷二百三十七

列傳二十六

一

梁民相 字井鄉萬歷進士授零陵縣

杜華秋 字思遂萬歷舉人東安知縣

麥秀岐 字德徵舉人知萬年縣

陳超然 字成雅萬歷舉人歷玉山縣

鄺鎮方 字李叅萬歷舉人知藤縣

關管 字誠要萬歷舉人歷河陽知州

龐一德 字與虔萬歷舉人施州衛教授

杜熙陽 字耀均萬歷進士授歸安令

張上科 字養哲舉人授華容令

鄺堯齡 字若欽萬歷舉人裕州知州

霍得之 字叔求天啟舉人工部員外郎

龔庚 字長孺天啟舉人鍾祥知縣

鄧公慶 字衍之進士官御史參議

謝德壽 字超常子

鄧騰雲 字非皇崇正舉人知崇善縣

麥霄 字後耕

譚兆德 字本智

陳宗源 字肫堂

黎夢蘭 字男英

梁柱 字產喬

譚憲 字懋襄

吳繼光 字應蟾天啟舉人

潘兆麟 字感萬舉人涪安知縣

潘獻臣 副榜

方以申 字啟襄邑諸生

馮公亮 歷任福建理事同知

符宇一 涿州府經歷以上明

以上南海

吳文震 字劬發紹定進士歷欽州守 宋

張舉 字元直建文進士戶科給事

涂瑾 戶部主事

洗用行 鎮江推官

黃夢鯉 字躍龍萬歷歲貢任雷州學博

曹承詔 字丹孺萬歷舉人東安教諭

湛自立 字率甫萬歷舉人任南平縣

劉維典 字宏先歲貢漳州府教授

吳光斗 字文樞歲貢歸善訓導

吳光祚 字文錫恩貢松江通判

周思敬 南城知縣以上明

陳世用 字穆周陸豐訓導

伍暹 字熊叶歲貢陽江訓導

張國勝 州同

蔡偉鵬 字燕侯歲貢普甯訓導

劉裕文 字英長

蔡中立 海康籍康熙歲貢從化教諭以上 國朝

以上番禺

盧宗文

字子敏至順間由辟舉
歷廣州路推官元

熊德

字惟一景泰舉人授汀
州推官

周倫

字通叔嘉靖舉人恩桂
平令

鄭漢昇

鄭元和

上三人俱以孝義旌

王夢鳳

單綱

府學生

盧應周

字少文以子崇勳貴
贈奉政大夫

王應相

府學生

馮際可

黎會禮

字克美

雷應徵

字穉名萬應舉人

趙仁夫

邑諸生

鄭文炳

字孔熙

湛德沛

邑諸生

盧國信

字民信

黃袞

字朝儀

周瑞

單雍

字惟沃

林光

吳廷講

字惟沃

吳世淇

吳本

字復初

吳謙

何統

字承之

吳效伊

字在夫

何惟明

字少燦

王就

字仕賢

盧應奎

字少燦

湛恭

湛江

字宗遠

黎臨惠

字允仁

湛武功

字文濟

梁勝任

字少南

湛廣德

字君吉

鄭大任

字宏重諸生

黃翼朱

字茂行諸生

黃亢宗

徐應德

字時美禮部儒士

葉友文

鄭璇

字玉旋太學生

黎燮伍

單光耀

字林與

葉逢遇

字際亨
以上明

以上增城

温琇 字如玉 永樂監生知永春縣

周京 字文都 成化舉人授應天通判

譚律 字仲和 成化舉人 歷建昌教授

張璧光 字純卿 宏治舉人 知懷集縣

鄭時舉 字一鵬 正德舉人 歷遷南甯同知

彭漢 字源嶠 嘉靖舉人 連城合

梁大中 字慕臺 嘉靖舉人 歷漳州推官

陳詰 字惟異 舉人 興化通判

湯殷 字葵亭 萬曆歲貢 鬱林學正

茹馥 字毓英 萬曆舉人 象州知州

張元度 字侯裕 天啟恩貢 授分水令

梁奇顯 字肫慶 天啟舉人 工部司務

譚正國 字康侯 崇正進士 廣西道御史

黎應珍 字聘伯 以上明

湯應華 字宜質

余樞 字養訥

李元 字景亨

以上新會

朱琳 景泰舉人 知龍溪縣

鍾萬祿 萬曆進士 兵部郎中

劉鳴泰 歲貢生

以上清遠

梁該 字博甫 欽州通判

方俊 字彥卿 景泰舉人 藤縣知縣

李讓 字遜之 永樂監生 歷原川同知

李興 字叔起 成化舉人 知長泰縣

黃印 字廷章 成化進士 歷遷梧州同知

易龍 字體乾 貢生 郴州訓導

許相 字廷翰 正德舉人 建安教諭

張傑夫 字凌山 嘉靖進士 戶部主事

施應岳 字粵賓 歲貢 唐府教授

劉杰 字望嘉 靖舉人 歷新城令

李彛 字體倫 萬曆舉人 知大庾縣

陳策 字文台 萬曆歲貢 歷端州教授

呂孝昇 字光遠 天啟舉人 授崇德縣

胡一魁 字伯連 崇正進士 漳浦知縣

黎起龍 字驄瑞 順治舉人 茂名教諭

李逢年 字豐公

黃隆光

張顯遇 字德常 康熙進士 授英山縣

林堯聖 字啟彥 以上 國朝

鍾萬春 嘉靖舉人 知思恩府

禰庭芬 邑諸生

梁大積 字行建 邑諸生 以上明

李秋 縣尉

王拯 字以仁 天順舉人 歷昌化縣

梁詡 舉人

甯寬 字子莊成化舉人知橫州

何唐弼 舉人

陳用原 字志道

黃裳 字文仲徵辟不就

黃受益 字虛已

祁孜 字惟勤宏治舉人

謝鯤化 字雲鵬長樂訓導

袁天恩 字紹仁

尹彬 字式公萬曆舉人

陳鳴瑜 字瑜之崇正舉人高明教諭

尹鑿 字產素邑諸生

祁易 字時生

李生光 字貞明

張明政 字正大

黃雲燦 崇正舉人

溫迪堯 諸生

李翰廷 字昌業諸生

方登庸 字華西

蔡涇 字元真

翟登雲 字羽儀鴻臚寺序班

簡祖英 字世英建平令

袁友信 字雲蘿七閩經畧

尹紹禹 字希載

鍾雲祥 字天兆

劉日新 字宗毅

陳學銓 字全人崇正舉人

李大震

李大霖

李如榴

陳朝資 字敏忠

陳良泰 字元表

梁煌哲 字生洲

梁惠生

袁清吉

李元表 字敬可貢生以上明

殷嶽 字昂卿順治舉人

韓夢吉 字叶公順治舉人

尹天水 康熙舉人內閣中書授潮州府教授

葉元龍 字御六貢生知灌陽縣

陳驥傑 字萬穀邑諸生

方文德 字覺尙康熙副榜

丁演 字德敷

黃士英

羅日章 字淡如

陳家萃 字松岳康熙武舉歷宣府前衛守備

李繼燕 貢生歷吳江令

王義臣 字宜友舉人授南漳令

蘇哲 字達源貢生海康教諭

尹象晉 字日昇邑諸生

張祚恒 字毓貞

尹啓元 字貞行

陳桂 字叔芬貢生

鍾曉宣 以上 國朝

以上東莞

劉必恭 訓武校尉

劉必從 邕州副將 以上宋

周偉 字伯達鎮江路總管

周壽 瀧水縣丞 以上元

莊恭 字克敬洪武舉人歷上林院監

林茂 洪武舉人刑部員外郎

徐伯良 字顯人永樂明經都察院都事

黃衷 字秉中正統舉人歷永州知州

謝輝 字明甫景泰舉人魯府長史

鄭宗維 宣德舉人太平府教授

黃結 字資友正統舉人歷遼府古長史

徐觀 字瀾若景泰進士南京刑部郎中

陳溥 字文傳授訓導

陳疇 正統解元任教諭溥子

陳昕 成化舉人歷助教疇子

陳鳴鸞 昕子成化舉人歷晉甯知州

鄭慈 舉人知臨武縣

袁天麟 字國正成化舉人興國教諭

李鉞 字德威成化舉人建甯教諭

方湜 字本清成化舉人歷新城令

鄭鴻 字振儀成化舉人

劉毅 字子仁宏治舉人衡州府教授

陳思 字宏濟宏治舉人歷廣南知府

王尚學 字宗儒宏治舉人柳州同知

李一甯 字應坤正德舉人懷甯知縣

袁承德 字汝進正德舉人連城教諭

張鵬 字于用正德舉人歷知歸化縣

余光裕 嘉靖舉人知柳城縣

彭芹 字公獻嘉靖舉人馬湖同知

梁彥錦 字綱夫嘉靖舉人歷岑溪令

翟珠 字景珍嘉靖選貢沅州學正

謝永禕 字德美嘉靖歲貢翰林院孔目

方士彥 大同宣府經歷

李同芳 字公揚萬曆進士歷刑部主事

李夢日 字爾明萬曆舉人兵部主事

趙希孔 字象聖萬曆舉人授華容縣

趙環 字佩仲萬曆舉人順慶丞

余士奇 字才伯萬曆進士歷甯國知府

趙善繼 萬曆舉人授蘄州牧

方遂干 字叔翔萬曆舉人晉攝沅州

羅士俊 字英甫萬歷貢生紹興訓導

尹守禮 字用敬歲貢思明教授

葉廷會 字以嘉進士廣西副使

梁志勤 字勵修歲貢遷上林教諭

袁用雨 字辰用歲貢連平訓導

何燦 字汝輝舉人知分水縣

羅節卿 字貞可舉人應天推官

潘光統 字少承光祿寺署丞以上明

楊思誠 字伯真順治貢生高州學正

袁學源 字容卿順治舉人羅定學正

梁雲扶 字圓嶠順治進士歷吏部主事

歐應辰 字憲君康熙舉人授浦城令

梁金震 字允大康熙舉人授安化令

麥振秀 字毓子康熙舉人儋州學正

尹漸達 字望知康熙舉人歷曹州知州

鄭光祐 字耀宗貢生甯陽訓導

袁兆祥 字金叶舉人授輝縣令

張士演 字濟遇康熙舉人授濰縣

鄧士楫 字濟卿康熙舉人授臨穎令

溫時夏 字餘友康熙舉人博羅教諭

黎之瑞 字時亮康熙舉人歸善教諭

何培 字聖因貢生司鐸欽州

郭中令 字時公貢生歷長甯教諭

毛德華 字曦瞻貢生大埔訓導

劉中行 邕州左右江提舉

何仞樾 字雨口歲貢南海訓導

高嶷 字鼎重歲貢廣甯訓導

何清 字殿元拔貢普甯教諭

李猶龍 字劍光貢生陵水教諭

尹崧 字喬嶽貢生吏部司務

尹廷煦 崧子太學生

尹廷勳 崧次子貢生高明訓導

方苞 字克培歲貢授華亭令

黎之綱 字豈公康熙副榜海康教諭

翟廓翔 字興有歲貢保昌訓導

尹元達 字中吉歲貢開平訓導

譚必售 字在京拔貢饒平教諭

黃廷珍 字席之

何子美

陳應義 諸生

歐國平

盧志中 邑諸生

鮑瑞 字伯秀

鮑鵬 字字宏瑞子

劉尚義

鄭儼 字齊山太學生

黃巍生 字對先監生

毛超宗 字逸先監生

何源彭 字潤萬 邑諸生

鄭光先 字開坤

鄭三讓 字德將

陳鏗 西隆州州同

鍾士傑 字端岳 邑諸生

陳光龍 邑諸生

盧廷生 邑諸生

鄭子綱 字秉常

蕭調元 字體仁 邑諸生

梁士元 字長人 府庠生

高狝 字羽叔

何鴻昇 字賓漢

何積 字善家 歲貢生

陳讓 字遜揚

麥陟瞻

鄭述任 字華望 乾隆舉人 以上 國朝

以上香山

鄧寶

區子服 字文望 武宣縣丞 以上元

何璨 字汝輝 舉人 知分水縣

黃澤 字若雨 進士

黎露 字元湛

蘇範 字景賢 舉人 宣城知縣

鍾華 字美章 舉人 知光澤縣

鄭學醇 武緣令 著勾漏詩草

陳綬 字學之 進士 歷工部郎中

歐達勳 字仲策 萬歷舉人 授膠州守

歐達轍 字仲毅

張煥 字堯文 萬歷舉人 授龍潛令

馮紹京 字敬字萬 歷舉人 歷睢甯令

游學程 字翼傳 萬歷舉人 歷富川令

何元達 字伯聰 鄉薦 知永康縣

倫文 字紹周 進士 任柳州府

馮瑞 字子厚 萬歷舉人 歷柳州推官

歐汝梓 字喬若 著有映雪軒詩草

梁廷賓 字侯儼 諸生 崇正詔舉孝廉 以上明

胡光瑗 字遠叔 順治進士 丹陽知縣

陳公起 字式觀 舉人 與甯教諭

林羽翽 字漢直 以子逢春 貴贈戶部主事

馮辛 字謙迥 諸生

李彥 字克甫

梁應期 字汝賢

羅孫衡 字元中

劉明岐 字任文 康熙舉人 內閣中書

潘隆晉 字峭江 舉人 授得禮令

羅朝彥 字笑泰 康熙舉人 授化州學正

歐陽二酉 字學山 康熙舉人 授崇義令

勞文昭 字張君諸生

趙汝廣 字希貞邑諸生

梁希學 字叔思

潘簡 字子敬以子貴封文林郎

何載寵 字子玉舉人知富陽縣

薛維翰 字崧百

蘇善瑞 字恒瞻

吳有芬 字作霖歲貢生

何世熾 字大五

陳際臨 字務敦康熙舉人儋州學正

謝振基 康熙舉人東莞教諭

梁學源 字祖克康熙進士遷安福縣

曾孫來 字愷之康熙舉人歷高州教授

梁文泗 字嗣芳康熙舉人

何士達 字悅公康熙進士廉州教授

陳尙賢 字履思中書

譚錫珍 字善公康熙舉人

蔡雲章 字允衡貢生永安訓導

黃凌舉 字達可貢生

羅慶雲 字延金邑諸生

譚居廣 字宣乾

楊良 字良平諸生

區上昞 字沃君

陳舉 字惟賢

梅元捷 字以謀新安教諭

梁仕魁 字國達

馮階 字謙符

陳以恪 字寅衷

何載陽 字子元副榜

胡拜書 字幼丹

梁鳳舉 字季魯諸生

鄭觀琅 字德球

蘇明守 字元之康熙舉人

陳憲祖 字務方康熙舉人知常山縣

何斌臨 字簡齋康熙進士遷休甯縣

李殿華 字竹君貢生香山訓導

何際可 貢生感恩訓導

黎益進 字顯如康熙進士惠州教授

梁偉申 字芳之康熙舉人欽州學正

余雲祚 字善將康熙進士

薛一才 字奏韓康熙舉人崖州學正

蘇漁 字允賢雍正甲辰舉人

簡觀 字式三雍正舉人高要教諭

鄧殿拜 字立雲歲貢歷化州學正

羅仲璧 字樸齋

薛洞翔 以孝行詳請建坊

余元璟 字偉之

羅昌士 字仲行

蘇其寐 字覺夫

楊天錫 字魯眉貢生

歐士瑄 字協侯諸生

何觀禮 字命卿

鄭國相 字鳳陽

黃兆理 字耀芝

余錦 字似齡

蘇履中 字格卿

梁寵元 字殿一

嚴應祖 字若創

梁逢禧 字英壁

陳國琤 字介孚

黃鄭冕 字周五

陳瀾秀 字瑞芋

游鵬翼 字允凌

辛慕霞

陳文斗 字尊光

潘度心 字殿侃

蕭茂長 字英連

梁逢勳 監生

楊為盛 字光表監生

何展成 字濟美

朱文淵 字闇然

李暉見 字行剛

何鐘景 字知勤

趙爵 字晉甫

嚴蔚 字惟喬

葉耀成 字廷輝

潘天培 字埭植

梁允瑞 字熙瓊

魯文光 字凌霜

陳世隆 字渭南

盧衍阜 字鶴先

盧若虛 字淡公

梁日光 字象洲

何成遂

顧統四 字宗仁

李長茂 字殿榮

陳舜法 字予若

楊開春 字梅先貢生

楊繼顯 字昭宇諸生

余錫洪 字允周

黃啟圖 字務顯

何孫賢 字和子

李德林 字朽山康熙歲貢化

李德柄 康熙舉人歷無錫知縣

梁家隆 字銳五

嚴中和 字徽五監生

蘇正學 雍正舉人授德慶學正

羅世健 字臣乾拔貢

關夢球 字子璇雍正拔貢南雄教授

羅士宏 字文湛監生

何際盛 雍正恩貢徐聞教諭

余朝瑞 字文迥貢生

蔡洪恩 字捷之乾隆元年舉孝廉方正以上國朝

以上順德

梁震 字應辰宏治舉人歷衡山令

梁文 字道顯歲貢遷江教諭

梁鉞 字南金歲貢永淳教諭

譚圭 字碑璧嘉靖舉人永淳知縣

麥應時 字思宗萬曆舉人和平教諭

李宗訓 字天閣

楊志稷 字相甫

李密 字汝慎

李師孟 字元醇監生

曾晁 字璿經

楊恕 舉人

李注 字德澤

蕭鳳鳴 字于喈

歐陽勛 字懋忠南昌經歷以上明

以上從化

譚學源 字又損舉人知貴縣

郭用賓 字星陽萬曆舉人授甯德縣

廖津

黃甲才

譚從菊

譚璵

黃惠

廖登 字左君

廖志學

葉本

李煌 字君穎諸生

廖昌裔

廖衍泰 以上明

以上龍門

李達 字士通歲貢歷福州學正

李時 字子中成化歲貢

李越 字士奇嘉靖歲貢授漳浦訓導

李克 字汝輝嘉靖貢生長興教諭

左敬 字士英龍慶貢生歷梧州教授

許大彥 字思贊恩貢興甯教諭

陳善道 字汝敬瑞金訓導

余偉 字彥恒

陳宜生 字仲義合浦訓導

蔡鎧元 字振孝

趙家璧 字城易萬應舉人

趙宗儀

李萬年 字松菴諸生

容維翰 字建勳萬應貢生歷

羅彥俊 字周轉萬應貢生南

劉堅榮 字誠寵萬應貢生國

伍于愷 字亦愷萬應歲貢福

李沾春 字允魁歲貢教授

黃中美 字尚夷萬應歲貢鎮

容文燧 字虛白萬應舉人歷

李日新 字道遠

伍兆鰲 字名高貢生

李成 字冕琪康熙舉人

雷渭 字明淡諸生

雷復初 字明生

高狃 字凌表諸生

葉良輔 字元佐諸生

蔡崇芳 字元惠諸生

李崇寬

陳昌言

雷曰驥 字允騶諸生

伍倫炳 字瑞常

伍雲燦 字道年諸生

雷日進 字德旻

李思誠 以上 國朝

以上新甯

何翰 字羅峯萬應貢生歷雷

陸丕顯

李先春 諸生

陳冕 諸生

陳治策 號丹泉

陸之 邑諸生

劉元化

范奎

劉應奎 字思靜

周良能

陳蒙棟 字貽升

徐麟士 字簡之 以上明

董芳 監生韶郡教授

陳爵

陳薦 驛丞

李岳 字習之

周崇仁 諸生

李端環 字侯輯 諸生

黃元標 諸生

范念劬

陸殿掄 字金卜

陳行日

鄧仲璠

陳協歐

歐陽大業 諸生

溫觀宸 諸生

胡肇高 諸生 以上 國朝

以上三水

鄭志忠 宏治進士 授麗水令

潘甲第 字伯登 嘉靖舉人 授貴縣

馮光翰 字國賓 歲貢 累官廉州教授

鄭璫

洪信 字孺成 萬曆舉人 應連江縣 以上明

何麟運 字玉書 順治舉人 兵部督捕司

吳祚 字廷錫

陳惘 字見誠

文統 字一元

梁梓

鄭鑑

鄭潤 以上 國朝

以上新安

畢烜 字彥晦 萬曆進士 戶部主事

陸衍 以上明

以上花縣

馬襄 字服良 景泰癸酉舉人 官至潯州府知府

何其厚 字應坤 嘉靖庚子舉人 官戶部郎中

張忭 字懷美 嘉靖庚子舉人 官福州別駕

陳良珍 字在樸 嘉靖己酉舉人 官永州同知

鄭兆芝 字鍾美 嘉靖甲子舉人 官徽州通判

徐哲 字成先 舉人 南甯教諭

陳宏乘 字任夫 天台教諭 善化令 祀名宦 鄉賢

葉懋 字維新 崖州學正

蘇民懷 字子仁 舉人 民部員外郎

譚大經 字彥倫 隆慶丁卯舉人 延平通判

周裔登 字朝亮 隆慶戊辰進士 官滇南憲副

周裔先 隆慶進士 官太僕卿

黃應兆 字道正 隆慶庚午舉人 官大理寺評事

鄧璿 字璣伯 隆慶庚午舉人 管林太守

倫應祥 字履卿 萬曆癸酉舉人 知蘄州

吳道昭 字懋中 萬曆丙子舉人 餘慶令

馬夢吉 字一甫 萬曆壬午舉人興化知府

劉裔 字維基 萬曆戊子舉人知亳州

馮球 字泰卿 萬曆癸卯舉人臨桂令

鄭茂緯 字承聚 萬曆庚戌進士新淦令

梁騰茂 字翁之 諸生知上林縣

鄺洪照 字遠台 天啟甲子舉人光山令

王駿聲 字效昭 崇正庚午舉人平江令

鄧務忠 字子良 崇正辛未進士湖廣參議

袁亞長

郭廉

高士楠 字建卿 嘉靖壬子舉人太平知府

霍注淇 字殊湛

馮治 字時雍 成化辛卯舉人浮梁訓導

霍尚守 字益芳 諸生

馮體旻 字象君

吳龍正 字雲御 崇正壬午舉人

黃友信 吏員工部員外郎

方貴夫 字伯顯 永州通判

岑平 號雲菴

陸任忠 字希旦 正德丙子舉人梧州府同知

陳凱世

鄧冕 字用純

龐端學 字季昭 諸生

黃懋憲 字元度 諸生

蔡連榮 字嗣馨

梁兆祥

費希冉 字師敬 諸生

杜長喬 字仲培 崇正丙子舉人

郭元昇 字開仲 崇正壬午舉人 以上明

馮璉 字彌若 舉人漳浦令 國朝

以上南海

涂麟 嘉靖甲午舉人知柳州府 明

陳傑昌 監生

張孫煥 號雲山 以上 國朝

以上番禺

黃鸞學 永樂癸卯舉人慈利令

歐昌 字世昌 成化甲午舉人懷集令

龍宣和 號五江 宏治壬子舉人晉江令

龍垓 字樵春 嘉靖癸卯舉人臨淄令

周士宏 字仲仁 嘉靖癸卯舉人虞部主事

鄭昊 字祖欽 進士柳州知府

梁典 字惇伯 舉人建昌令

胡其偉 字光緒 舉人九江知府

董仕正 字希泰 舉人桐廬令

余嘉詔 字彥倫 嘉靖乙丑進士南福建道御史

鄧鑑 字少妍隆慶庚午舉人

馬壯行 字幼珍萬曆己丑會試副榜建平推官

葉朝陽 原名德萬歷戊戌會試副榜蓬溪令

羅廷璋 字孟珍萬曆甲午舉人衡州同知

高鳴雁 字維石萬曆甲辰舉人桂林推官

黃公儀 字元禮萬曆己酉舉人河池牧

黎象斗 字樞漢天啟甲子舉人思州推官

黃夢賚 字子良崇禎癸酉舉人高州郡博

鄭旒 字承袞歲貢

羅永祥 字吉迪山海衛正千戶

薛碧 字敬叔崇禎壬申舉人

羅大賓 字敬叔崇禎壬申舉人

梁亞翼

梁獻言 字諫甫諸生

鄧儒震

田汝志 字炳如

陳世濂 字懋周諸生

何絳

潘鳳昌 字允韶諸生

劉雲漢 字卓之諸生

李瑄朗 字崇樸薦舉鴻博

鄧彪 字獻升薦舉鴻博

康良臣 字茂克都司

李晟 字愈昭監生

譚師孔 字所願萬曆癸酉舉人龍安同知

余祖頤 字於正舉人翰林院孔目

梁秀林 號麗所歲貢遂溪教諭

吳範 字介吾萬曆甲午舉人萬縣令

余猶龍 字禹翀萬曆丙午舉人永昌知府

梁棟隆 字洛文萬曆壬子舉人吉安同知

曾宜高 字清仲天啟甲子舉人萬載令

楊節 字叔廉正德己卯舉人松江同知

梁王瀚 字光宸

梁奎 字文燦諸生袁州通判

薛文昭 字東琳

鄧泉 字濟之諸生

梁貞 字惟正宏治乙卯舉人

張景良 字廷彥庠生

羅眞英 字敬眞

廖晃 字纘明諸生

梁右達 字漸于崇正己卯舉人

馮國祥 字祉陶廩生

李文高 字次白康熙甲戌進士

羅世舉 字臣廉副榜

羅國器 字躍劍解元

胡國相

何大哥

廖文愈 字澄江

歐瓘

吳循

黃斌 號槐軒

梁液 字可成

吳景暘

張熙 字中卿

蘇景熙 字汝載諸生

馬復亨

黃廷璣 號翠屏

黃鎬 字建周

馮文俊 字子孟

曾效孔 字聖傳

吳鳴鳳 字儀聲

何恒產 字心田 以上明

劉振國 字善徵 順治辛卯舉人 西和令

趙德 號劬園 康熙丙午舉人 鄧州知州

劉聞得 字元政 康熙癸酉舉人 清平令

吳奇遇 字贊元 康熙己卯舉人 靈寶令

薛起晉 字君翔 諸生

胡景憲 字汪孩 監生

胡宗瑗 字嗣高 監生

胡汝嶠 字文剛

羅良會 字子儀

黃承詢 字公謀 庠生

何良法 字叔時 庠生

薛斌 字彬先

胡炳 字安貺

梁廷佐 字彥騰 貢生 惠來教諭

鄧代環 字之循

李逢春 字崇璣

何懋全 字際君 諸生

吳永發 字國彥

梁成之 字文升 庠生

潘世禧 字藹之

陳世和 字聖取

區斌 字兼雨 康熙壬午武舉 千總

何文康 字燕生

何仰尼 字文仲

楊達 字漸夫 廩生

梁建明 字國樞

顧鳴珍 字奕廷

胡天球

李殿苞 字桐君

顧台相 字御侯

胡式輿 字鄉憲

何景辰 字映垣

胡汝峻 字端白 舉人

胡景泰 字冲孩

胡汝護 字國持

陳觀光 字師臣諸生

蘇朝憲 字永清

魯燾 字賢子諸生

李殿莒 字梅君貢生永安教

李伯儀 字癖愚

林嗣良 字性奇

嚴鶴年 字會萬

胡宗穆 字敬之

岑宗周 字希文諸生

葉之盛 字嘉奉廩生

關景祐 字華天

余邑菘 字越萬

胡耿 字觀彥歲貢茂名訓導

陳守志 州同

胡天運

楊才 字儉平諸生

林瑯 字魁翰

梅萬祉 字介民

梅挺似 字儼先

梁廷翼 字式君監生

黃象坤 字揆先

余潢 字徽讓

何大倫 字其餘

何上晉 字騰客

梁顯榮 字凝勳

胡燦 字邦彥

吳超倫 字功上歲貢

楊代紀 字道綱雍正甲辰舉人

羅應舉 字體遠雍正甲辰舉人

吳國璋 字景文

蕭卓 字輝五

梁彥 字書升諸生

呂永錫 字顯猷 國朝

以上順德

祁勝宗 字孝思永樂貢生交趾建平府長州知州

周觀德 吏員口婁巡檢

鄭敬 字德聚正統壬戌進士山東副使

彭世潮 字源大嘉靖乙酉舉人左遷福清令

盧堯典

林培 字培之萬曆癸酉舉人仕至光祿少卿

鄧堯章 字君煥萬曆癸酉舉人刑部郎中

李元弼 字相所萬曆丙子舉人分宜令

盧應元 字其魁萬曆乙酉舉人茶陵知州

洪信 字孺成萬曆乙未會試副榜連江令

蔡聖詔 字季宣萬曆乙酉舉人敘州知州

張一鳳 字聖瑞萬曆丙午舉人湖廣督糧副使

何鎬鎮 字基周

梁文賓

黃成章 字德成崇正庚午舉

黃勣

陳士俊 字哲卿

翟繩祖 字從先

周一士 字貴謬副貢

姚世熙 字玉如諸生

何荆玉 字體孚萬曆甲午舉

張應申 字維正萬曆丁酉舉

林坦 字坦之萬曆丁酉舉人

劉獻翼 字于喬

陳其琛 字秉獻萬曆癸卯舉

簡知遇 字伯葵萬曆戊午舉

張嗣垣 字仲師

黎獻 字子文

謝璋 字器美

李佺 字白子崇正壬午舉人

王言 香山所昭信校尉

鍾相 字燮可

袁冕 字德輝

陳一教 字在脩

何士奇 字節之

邱連奎 字文兆

劉鉅 字孔武

何應陽 字伯隆崇正庚午舉

溫一復 諸生

林尙樵 字伯隆崇正庚午舉

祁之芹 字乃勤

劉繩武 字明遇永曆時副將

李理 字玉輝宏治己酉解元

謝重華 字嘉言副貢

尹之遠 字爾任順治丁酉舉

陳廷瑄 字諤子順治庚子舉

劉連輝 字月子順治庚子舉

張朝紳 字偉行康熙甲辰進

莫宏濟 字汝航康熙己卯舉

盧挺 字松士康熙戊午舉人

李繼熙 字式穆康熙甲子歲

李之秀 字挺萃康熙丙子舉

張和 字會美諸生

祁宗方 字恒象

尹廷勳 貢生 特旨選舉陵

袁崇景 字士求康熙戊午舉

林樅 字叔吾諸生

彭焜 字晉公恩貢

盧澐 字叔遠康熙己酉舉人

羅寵賁 字爾亮廩生

尹治進 字右文

温璉 字獻文

李樞臣 字元襄 諸生

彭寵文 字煥君

周炳 字遠伍 國朝

以上東莞

黎民憲 字惟鑒 貢生 旌德教

李曰芳 字元暢 正德癸酉舉 人長汀令

曾鳳舉 字翔千 舉人 京山令

麥春芳 字蒲源 嘉靖癸未進士 貴州提學

黃應中 字於理 貢生 羅城令

曾綽 字裕伯 貢生 嘉興教諭

曾士楚 進士 御史

李佐 字叔宰 嘉靖壬子舉人 辰州同知

鄧文炳 字挺南 隆慶丁卯舉人 定海令

歐陽潢 字崇積 隆慶庚午舉人 南靖令

鄧正吉 字起元 萬曆己卯舉人 定襄令

劉克修 字少已 萬曆壬午舉人 海州知州

李師曾 字元曾 貢生 桂林通判

曾士懋 字子德 萬曆辛卯舉人 勾容令

李慎良 字六如 貢生 臨桂令

鄧光縉 字有容 建昌縣丞

鄧廷藻 字翼生

劉克正 字懋一 隆慶辛未進士 官簡討

李光昇 字谷初 崇正庚午歲貢 以上明

黃遂 字月璧 天啟歲貢 中書舍人

李日奇 字乘御 貢生

李魁元 字多峯 康熙丁丑拔貢 字德隆

會光世 字暉青 恩貢

李非匏 號厚菴

黃士竑 字乾參 諸生 以上 國朝

以上從化

葉秀宇

譚鳴周 字台室 諸生

李元厚

黃宗誠 署巡檢

何嘉容 以上明

以上龍門

林以良 嘉靖辛卯舉人 橫州牧

黃文典 字叔貞 嘉靖甲午舉人 繁昌令

盧應科 字賢甫嘉靖戊午舉人望江令

尹思教 萬曆己卯舉人石城令

周文輝 字宗實貢生興化通判

陳敬 字周叔

湛德溥 字原道舉人華容令

張文海 字應暉諸生

黃拱寅 字國倩萬曆甲午舉人

黎許 字璧光

陳燦 字穉名萬曆戊午舉人

林子瑛 字純學

盧應徵 字君明庠生

黃棣 字如珩

李祐 字元光

馮雅玉 諸生

鄭志釗 諸生

黃性申 字淡觀貢生

呂其瀾 字升吉戊午副貢

姚階及 字世光貢生陽春訓導

陳輝宗 字躍珍

張兆璋 字躍珍

以上增城

陳經綸 成化丁未進士戶部主事象州同知

余敬 字行簡宏治庚戌進士南京御史

李惇 字叔厚貢生懷遠令

吳良弼 字進可歲貢興業教諭

張天祿 字基命天啟乙丑拔貢安仁縣丞

湛羅樵 字邦寵

黃蘭 字國馨廩生

張少連 字舉之諸生

黎元熙 字雍孺庠生

湛子雲 字翰卿崇正壬午舉人

黎明 字孟昭

鄭士璧 字君明庠生

王惟賢 字灼非

單養正 字純學

劉嘉彥 字元英永曆朝御史

盧弼 字元英永曆朝御史

馮天載 字跨顛諸生

鄭天萊 字紫函貢生

湛宴 字文安康熙壬午舉人遷安令

姚蕙 字蘭仲康熙癸巳舉人

黎祺 字融介

伍天長 字昂出歲貢生

湯和 字清軒成化貢生知定安縣

李江 字朝宗宏治壬子舉人任梧州推官

李文明 字朝光宏治戊午舉人福建建甯同知

鄭銘 字克新宏治乙丑進士袁州知府

趙善端 字宏仁貢生龍溪縣丞

容朝望 字幾石嘉靖庚子舉人長蘆運同

黃子正 號梅所

郭元 字確得

黃孚 字顯伯恩貢德化教諭

湯敬升 字小槐萬曆辛卯舉人星子教諭

黃士欽 名棻諸生

李朝明 字君來增生

許炯 字彥韜嘉靖辛卯舉人

陳如龍 字用修

趙夢獅 字伯良崇正己卯舉人

林天培 字學彩

林阜 字應沚明季舉人

藍大芳 字發育諸生

張上柱 歲貢生

陳元定 字君準

容瀚 字約夫諸生

鄺達禮 字用和

區大韶 字而佐諸生

潘陞 字與登

張思仁 字崇體

湯良相 字聖輔諸生

吳訓 天啟元年舉人

陳應緯 崇正癸酉舉人

梁日輝 號匪莪崇正己卯舉人

劉坊 字懷點副貢生

林應禮 字紫厓

楊景辰 字元拱

鄭相 字文弼

莫以寅 字休倩以上明

王廷正 字伯堅康熙乙卯舉人

莫觀光 諸生

張偉仁 字質克康熙癸卯舉人

陳吳昌 字倬開康熙己酉舉人

陳任美 字重素歲貢訓導

劉仲良 字彥品以上國朝

劉士騰 字子朝嘉靖甲午舉人安仁令

楊維震 字孟超監生沙縣丞

唐政 字文和萬曆乙酉舉人

麥德 字聚我萬曆甲午與人

曹士選 號太連萬曆己亥貢

蕭來鳳 字啟韶萬曆乙卯舉人南甯同知

何若麟 字瑞游萬曆舉人姚安通判

梁國棟 字景昇天啟甲子舉人彭澤令

以上新會

何吾麟 字瑞虞廩生

梁富

張金元

曹啟益 字文泉貢生官知州

伍瑞隆 字國開河南兵巡道

王綽 字梅吾嘉靖乙卯戊午兩科武舉昭武將軍

何兆甯 字重軾庠生官總兵

梁思誠 字用孚以上明

楊思誠 字伯真順治貢高州

楊瓚 字鳴度康熙戊午舉人

劉信烈 字乾可康熙己卯舉人夏津令

梁源泗 貢生

劉相 字良情諸生

楊錫震 字寶生官學教習

宋宮捷 字祺生康熙己酉副榜大埔訓導

楊而和 字大樂諸生

劉君彩 字而先

楊節 字式卿歲貢

蕭一彬 字非野

曹起龍 字兆輝防徭游擊

繆志和 字子介廩生

黃朝紳 號瑞庵

鄭肇嘉 字文紀

陳國敘 字賓穆

李英妙

陳禧 梁山典史

楊應魁 字啟民嘉靖甲子舉人

黃仲翁 字壽昌

區大緯 字文昂貢生虞部主事

麥揮 字時化嘉靖己未武進士軍門贊畫

郭紹鸞 字瀛川嘉靖丁丑會試副榜岑溪教諭

毛定周 字景紹順治丁酉舉人丹徒令

李龍翔 字御昇康熙壬子舉人建平令

黃時應 字天行康熙己卯舉人昨城令

劉光裕 字紹同康熙癸巳武舉

鄭懿 字秉淵貢生

繆棟選 字俊廟

麥天縱 康熙乙卯副貢瓊山教諭

陳國光 字賓王諸生

楊屏 字翰遠康熙戊子舉人固安令

麥巒 字翠嶺歲貢生

高肖 字倫憲辛酉舉人

侯次公 字應三舉人

鄭廷璉 字子雲諸生

黃昌符 字正一

楊煒 字晉九舉人

繆良翼 字羽陵

郭蘭芳 字大振

黃銘 字鏡心

方岳 字中山貢生

方麟 字岫山

鄭三才 字兼將歲貢生

何儒 字席珍

劉清 字泳斯

鄭元衡 字英容 以上 國朝

以上香山

梁允泗 字起麟 萬曆癸酉舉 人橫州牧

陳九韶 諸生

陸滾

梁桂丞 字朝棟

鄧上昊 字鳳翥

陸志道

李克孝 字寐懷 諸生

陸肇泰 庠生

嚴而謙 字有嚴 貢生

陳綱

梁逢時 字直衢

歐陽文樂

梁文綱 字公振

李開 字兆啟

梁永濟 字素齋

梁鏞 諸生

梁廷檜 字彥超

梁華藻 字文宇

陸卓 諸生

鄧丕 號冷爐

劉原誨

何顯 諸生 以上明

以上三水

蔣上欽 字思敬 隆慶丁卯舉 人雲南同知

彭潔 字子澄 貢生

謝立 字朝卓 貢生 賓州學正

伍世標 字際五 貢生

王承宗 增生 署海萌所印

李名臣 襲千戶

李宗源 字亦源 歲貢 興化訓導

李彥芳

伍道明 字應韜 以上明

馮俊 字榮昌 順德千總

雷浩然 字允秉 康熙壬子武舉

李為瀧 字遂濟 歲貢

趙同炳 字公耀

余生直 字上寬

伍道沛

字作霖

以上國朝

以上新甯

黎安

貢生羅城尉

黎恕

嘉靖壬子舉人令鄱陽

孔煦

舉人衡州教授

徐兆鼎

萬曆己卯舉人晉江令升大理評事

温亮

諸生

陳敬

諸生

黃秉

諸生工部郎中

劉應虎

鍾于田

永州別駕

楊廷宣

貢生贛縣主簿

王宗源

以上明

夏雲

國朝

以上清遠

歐陽宏

字任重嘉靖己酉舉人永安知縣

吳允詵

字懋集萬曆癸卯舉人

潘楫

陳讓

字克遜

利懋

龍河

字聖兆

侯琚

吳允誨

字懋陳萬曆癸卯舉人

江振端

以上明

以上新安

畢汝濟

字川子諸生明

譚必貴

字毓明國朝

以上花縣

謹案各縣人物既多從通志採入者亦復不少前志有表做漢書古今人表之例所以免挂漏也然前志入傳者茲亦不能遍及故仿其例作表附于前志表之後俾後有考焉

南海李徵爵分纂

番禺史悠履初校

番禺史悠乾再校

番禺金佑基三校

南海顏以湘四校

廣州府志卷一百三十七終



